

上饒縣志 卷之五

山川志 隘塞附 水利附 關津附 橋渡附

禹平水土表厥山川千古不易至名斯傳高高下下阪險原隰森森長波峙此巖業清淑恒鍾雲霄屹立鞏固奠安
閩嶠允輯志山川

上饒縣

靈山在城西北七十里道家書列為第三十三福地邑之鎮山也山有七十二峯高數百丈綿互百餘里上有龍池東北峯挺立孤石宛如人形下有石井石室西峯絕頂有葛

上饒縣志 山川 卷五

仙壇遺址溪五派西流入上饒江唐天寶中嘗有龍居此遇旱祈之輒應

七十二峯 石屏峯在靈山中其形方正儼若列屏巔有潭深不可測唐天寶中禱而輒雨因名龍池飛泉瀑布高懸百丈遠望如練雖數百里外皆見 石人峯在靈山東北石挺立如人下有石人祠 馬鞍峯在石人峯東形如馬鞍 棋盤峯在馬鞍東方若奕枰 紗帽峯在棋盤東狀似紗帽 龜石峯在紗帽峯東形如龜 圭峯在龜石東廉銳如植圭 雙石峯在圭峯東兩石相聯 花巖峯在

雙石東峯下有巖怪石嶙峋如花瓣 雙峯在花巖南下
有聖井旱禱卽應 柘頭峯在花巖南與雙峯相對 鷹
嘴峯在石人峯西南高銳如鷹喙 疊浪峯在鷹嘴西數
峯層疊若浪紋然 迴龍峯在鷹嘴西山勢迴環故名
黃沙峯在迴龍南兩峯相對下有峯頂院 巖前峯在迴
龍西下有養真巖胡昭公學仙於此號松谷老人後居民
立祠祀之前有石塘四時不竭祈禱多驗 燃燭峯在養
真巖後一峯尖削如插燭 南塘峯在養真巖南 百谷
峯在南塘峯前 龍泉峯在南塘西有泉極清冽 笑天

上饒縣志

山川
卷五

二

獅峯在龍泉西怪石突起如獅昂首下有石泉當北鄉孔
道有亭名永世亭 水晶峯在遮嶺後懸崖瀑布飛瀉映
日遠望之若水晶 遮嶺峯在石洞西遮水晶前故名
疊石峯在石洞西南怪石層疊如疊高懸奇特人經其下
望之若將墜者 登樓峯在石屏西山勢疊上如階級歲
三伏日人登石屏燃香多從此攀躋而上因呼石階梯其
最險處於兩崖石竅中置杖橫大鐵索於上約二丈許行
者以手扶索循崖而渡稍下視則驚怖矣 粧臺峯在石
屏東形類鏡臺 粉盒峯與粧臺相聯石圓如粉盒 掛

衣峯在粧臺東形似衣桁 望郎峯在掛衣東峯石如人翹首俗呼老嫗峯 白雲峯在石屏西白雲常覆其頂

草堂峯在白雲南下有草堂相傳胡隱君居此 披雲峯

在白雲峯下兩峯相接故名 聚講峯在白雲峯之西數

峯列峙若聚講狀 鼠捕峯在聚講西狀類伏鼠 甌峯

在鼠捕西石如甌 東臺峯在甌峯西下有東臺菴 鞋

峯在東臺右石形如鞋 朝天龜峯在鞋峯西形如龜昂

首 老鴉峯在東臺西石似鴉 石佛峯在鴉峯西峯石

如人跌坐 天梯峯在石佛西石有天然階級可拾而登

上饒縣志

山川 卷五

三

俗呼上天梯 中臺峯在天梯南下有中臺菴明養菴禪

師居此 插旗峯在天梯峯右石竅圓深可卓旗下有洪

梁洞 方石峯在中臺西石形方正如琢成 龍頭峯在

中臺西山石陡起高懸如龍頭其下可列騎而過 圓墩

峯在龍頭西石圓如土阜 靴石峯在圓墩西形類靴

老人峯在靴石西狀如人盍背 西臺峯在老人峯西下

有西臺菴 水尖峯在西臺右水汨汨自石中出西流入

溪 華表峯在西臺南兀然一柱形類華表 龍鬚峯在

水尖西翼然倒垂如龍鬚 石合峯在龍鬚西兩石相合

人潛聲撫之則動搖發聲則否又名搖石 葛仙峯在西
峯絕頂高不可即相傳葛仙翁修煉處壇址尚存 鳳凰
峯在石屏西兩峯對列如鳳凰交鳴 石獅峯在靈山東
北狀如獅 九牛峯在石獅南狀類牛數有九 員山峯
在石獅西上有員山菴明季諸生鄭惠絕粒殉節處詳具
周伯虎序見藝文舊志增 春鳥花峯在員山西石色紅如
杜鵑 天馬峯在石人峯北狀如奔馬 天半月峯在天
馬東北形如偃月下有泉潺湲不絕名北澗響泉 五洋
峯在月峯北以地有五洋得名 黃泥峯在月峯西山多

上饒縣志 山川 卷五

黃土亦名黃土嶺有路通徽饒境 道士仙峯在靈山北
相傳有道士姓胡名超者修真於此後仙去下有洞風氣
往來輒有聲名仙洞鳴琴 頂心峯在靈山北羣峯之中
其峯獨尖聳下有龍泉水常溢出名陽際靈湫 三十六
尖峯在靈山北奇峯森列銳如卓筆凡三十六數 銅峯
在靈山北石色如銅其麓有七星潭天然石穴清可沁心
數有七象似天之北斗 白石峯在銅峯西色多白 高
城峯在白石西環峙如城最高峻 船石峯在高城西兩
石形如船 上下南峯在高城南有高低峯相接 齊眉

峯在南峯西兩峯並峙如列眷

攷寰宇記云上有龍池產水晶九域志云亦名靈鷲山
韓元吉詩云諸峯七十二磊砢畧可推定知水晶宮闕
藏神所司舊經云上有龍池多珍木奇卉兼出水晶荆
公詩云靈山甯與世爲仇斤斧侵陵日不休冰玉此來
聞長價市人無數起相讐

攷靈山九域志亦名靈鷲山明都御史高明詩靈鷲山
爲吾郡鎮巖巖氣象泰山侔上支天柱七十二下孕水
晶千百秋

上饒縣志

山川
卷五

五

國朝嘉慶間郡守王公賡言咏信江書院八景其一爲鷲嶺
風雲殆指此也與在廣豐縣東三十里名靈鷲山者異
明夏言詩立壁峭巖森似戟攢峯縣嶠蹙如螺九華五老
虛攬結不及靈山秀色多

明鄭以偉詩靈山七十二面面生奇峯如琢亦如削或開
玉芙蓉金陵分鼻祖甌越眞附庸臣嶽爲三老邀廬成六
宗水晶空浪志丹竈隱遺踪中有太上老巖居失秋冬時
登絕頂坐隔世雲重重安得從之遊誅蘿架雲松

國朝鄭日奎詩茲山何秀拔百里引瞻視人代幾戰爭山自

終古翠攢峯七十二奇詭不一致雷雨隱其中日月跳相
避深窈望不盡但驚截業勢應有探芝人高隱雲深處我
欲往從之究此山中趣年年遊屐阻臨風空感喟

山爲府治鎮山故首列之

舊志

南屏山在溪南從狼牙山發脈拱抱府治如屏又以形如奔
騎別名天馬山宋趙汝愚建南臺於上後廢旁別建謝文
節公祠今奉主同文文山合祀於信江書院春風亭朱夫
子祠

攷輿地紀勝云其山由東南以來爲波濤起伏之狀及

上饒縣志

山川
卷五

六

到治前則周環拱護秀潤之氣可挹下有祥符寺景德
寺大霞宮草衣寺靈山閣跨鶴臺

大霞宮草衣寺靈山閣跨鶴臺俱久燬惟祥符景德二
寺今尙存 攷靈山閣亦稱靈山亭在祥符寺內南宋
大中祥符間建元季燬於兵

狼牙山一作瑯琊山在南屏山東以峯勢尖聳故名中有東
嶽廟後爲文昌殿左爲聖母殿右爲睢陽祠

道觀山在溪南山石雄踞爲邑治右障上有谷神道院舊志
有溪山堂含輝閣樂歲樓信美亭皆廢前知府張國楨創

曲江書院於山麓後知府周錞元葺爲鍾靈講院知府陳世增改爲紫陽書院乾隆四十六年知府康基淵改爲信江書院此山弁入院基上建萬錦書屋有記詳書院門文筆峯在溪南山峯秀拔與府學相對故名

鐘山在溪南祥符寺前形如覆鐘上有跨鶴臺已廢

鉢盂山在溪南祥符寺當佛殿前形如覆盂

茶山在城北詳見古蹟志

五馬嶺在邑城西北二里許刺史姚驥因訪茶山陸鴻漸道經此故名

上饒縣志

山川
卷五

七

以上皆附治近山

舊志

吉陽山在縣北十五里崇孝鄉縣之少祖山也旁有蓮花石

皺文如蓮瓣坐可移日

王汝弼秋日登吉陽山詩秋風生短袂乘興偶然來蓮石晴雲掃松階暮靄開僧殘知寺古山合見龍迴破帽簪花倒相看不厭顏

王大堅遊吉陽山詩有一客恰分花一片花心陳設蓮花宴之句

烏鷹巖在縣北明遠鄉靈山南麓時有鷹巢於此故名今爲

僧舍

石城在縣北明遠鄉靈山南麓峭石壁立週環如城前有門中寬廣可廬而居避寇者多入其中蓋天然險隘也

鼇頭嶺在縣北八十里靈山鄉

柘嶺在縣東北八十里明遠安輯兩鄉交界處

鉛石山在縣北四十里靈山鄉石屏秀峙巖壑瑰異清池峻嶺與靈山低昂山麓有真武殿大士堂左下有鉛嶺菴曲仄盤旋爲北鄉之勝

三十六折嶺在縣北安輯鄉盤紆曲折凡三十六數始達嶺

上饒縣志

山川
卷五

八

表

石橋山在縣西三十里石橋鄉其上平坦如橋山半一穴嵌空遠望如月又名月巖宋朱喬年有鑿透巉巖不記春山腰千古掛冰輪之句

唐韋莊經月巖山詩驅車過閩越路出饒陽西仙山翠如畫簇簇生虹霓羣峯若侍從眾阜如嬰提巖巒互吞吐嶺岫相追攜中有月輪滿皎潔如圓珪玉皇恣遊覽到此神應迷嫦娥曳霞帔引我同攀躋騰騰上天半玉鏡懸飛梯瑤池何悄悄鸞鶴烟中棲回頭望塵世露下寒淒淒

宋陸放翁詩云幾年不作月巖遊萬里重來已白頭借問
連娟何所似平羌江上半輪秋

元趙孟頫詩月巖如偃月風泉灑晴雪仙境在人間真成
兩奇絕

婦石一名緝女石在縣西三十五里石橋鄉山頂如毬又名
毬石

天泉巖在縣西石橋鄉雲洞側中有僧舍不假瓦覆巖盡處
有泉自石罅出涓滴不竭幽勝與南巖埒

呂懷詩杖竹來雲洞紫紆一徑微珠簾晴欲捲玉漏點初

上饒縣志

山川
卷五

九

稀北闕星辰近南山日月輝看泉過別島不息是神機

蘇春詩斜陽頽澹萬株松下蒼苔鹿豕蹤莫道仙巖難
訪問白雲堆裡一聲鐘

九仙巖在縣西二十五里石橋鄉巖心有石大如箕四時常
潤天欲雨則聞滴瀝聲上有古寺明崇禎十一年捐造

國朝咸豐五年燬於賊同治九年住持僧慈光重建

舊志增

明楊時喬詩鍾靈佳氣滿山浮苔蘚嵐烟翠色幽漏滴半
空傳雨信臺陰十里障江流龍飛漢表雲歸鉢虎嘯林邊
風到樓我問山僧能解意夜深燈火爲人留

黃沙巖在縣西四十里石橋鄉空嵌可容百人巖後有兩泉
白石出溉田十餘畝

以上自一都至三十四都諸山

舊志

龍潭石在縣西五里開化鄉舊爲長吏遷擢宴送之所饒江
豐溪二水合流至是有石砢然雄踞溪澗下匯重潭名君
遷潭餘詳古蹟志

烏龜山一名五桂山在縣西南五里開化鄉諺云水打烏龜
石信州出狀元宋徐元杰嘗應其識云

烏石山一名溪旁山在縣南七十里開化鄉形勝巉巖如累

上饒縣志

山川
卷五

十

黑玉山半有穴橫深十餘丈中有石觀音一座

仙山在縣西二十五里開化鄉山勢幽絕欲雨則雲蒸明崇
正間守道貢修齡建龍王殿於上下有龍井零壇相傳山
巔有空棺村民迎以禱雨輒應禱畢昇至山中翌旦視之
則上升稱之曰仙板

明鄭邦福詩在世心情無一分巖棲借此實離羣獼猴絕
壁行相戲鸞鶴層霄坐或聞仙蛻已知飛白日空棺猶自
閣重雲到來岑寂休虛度更起焚香誦玉文

居山一名金鐘頂在縣西南十里開化鄉有徐兵馬祠

粧臺山在縣西三十里開化鄉圓類粧盒與毬石相對有鄭平真仙廟

焦石在縣西二十里開化鄉石色赤黑面瞰溪流上有古亭爲往來津渡處

接巖在溪西南十里開化鄉石室寬廣僧舍數楹唐大義卓錫處後廢明天啟間僧三應復建教諭彭份書接巖二字鐫於巖表王焯有記鐫石上

曹鳴遠詩懸巖落松關怪石寒雲護中有無字禪靜者自能讀

上饒縣志

山川卷五

十一

曹鼎望詩聞道接巖好今朝始快登千竿環翠壁一窟納羣僧山僻塵緣淨林深秋色增冷然石上坐人澹竟如冰白雲巖在縣西二十里開化鄉巖谷幽異隱隱在白雲中明養菴和尚創梵宇於此

過巖在縣西開化鄉雲洞後

一線天洞在縣西三十里開化鄉雲洞前峭石劃然中分一線

明鄭邦福詩鐵壁雙關一徑衝似龍獅象列諸峯只疑山鬼深林出忽起廚煙隔竹濃入坐儼然天尺五望雲如脫

夢千重三生石上俱忘盡可怪詩魔一再逢

雲洞在縣西三十里開化鄉天欲雨則興雲

宋韓元吉詩揮策度窮谷撐空見樓臺丹崖幾千仞中有
佛寺開老僧如遠公應門走蓬萊下馬問所適褰衣指崔
嵬飛欄倚石磴曠蕩無纖埃坐久意頗愜爽氣生尊壘仙
棺是何人白骨藏莓苔舉酒一酌之慨然興我懷丹沙固
未就白鶴何時來不若生前樂長嘯銜此盃

明楊時喬詩何年飛錫指南來一振懸空地脈開山聳自
宜無暑到洞深儼若待雲堆幾層塵室虛僧榻半壁松陰

上饒縣志

山川
卷五

十三

待舉杯誰道人天長縹緲獨憐鐘鼓響蒼崖

鄭邦福詩碧天連夜洗新秋與客雙趺最上頭月白臨巖
堪白捨心空無語亦相投竹根石劃虬龍寤峽坼靈通虎
豹柔願共此生常此際一龕之外復何求

天靈洞在縣西二十里開化鄉石室深邃內有天窗映日俗
呼透光巖

以上自三十五都至四十都諸山譜

龍蟠山在縣南五十里乾元鄉嶺有葛仙廟

馬鞍山在縣西四十里乾元鄉一石旁溪形肖馬鞍

按此山當郡城水口舊志形勝志所謂西有黃沙馬鞍諸嶺是也近爲取石者鑿傷過半形家過之輒咨嗟太息而無如何彼視爲利藪罔顧地脉不至鑿盡不止有守土責者若加以厲禁保全形勝未必不大有造於茲

土也前查道光間銘郡伯曾鐫示于崖永禁開採嗣以築城需石禁石被毀

包公尖在縣西南乾元鄉接鉛邑界一峯尖聳奇拔

黃沙嶺在縣西四十里乾元鄉高約十五丈

羊石在縣西南二十里乾元鄉石突起高十數丈儼如羊眠肢體皆具前石迴顧後峯環列明侍郎葉鐘家此因名曰

上饒縣志 山川 卷五

羊石里

八仙臺在縣南六十里乾元鄉峭石高聳寬廣如臺居民祀八仙於其上俗傳有上下八洞云

雲巖在縣南六十里乾元鄉巉巖峭拔雲氣往來中空如室有石觀音半面羅漢等形宋理學余正叔構廬讀書其中

洪巖在縣西南三十里乾元鄉臨溪一巖中有僧舍周圍竹木幽陰可玩左壁洞穿遊屐皆從此出入儼如石門

柱石巖在縣南六十里乾元鄉峭石拔起屹然一柱中有巖
相傳徐仙姑得道處

南巖一名盧家巖去縣治西南十里朱子讀書處豁然空嵌
可容數百人巖下朱子祠及僧舍十數楹不假瓦覆雖大
雨無簷雷聲有文公祠大義石一滴泉千人室五級峯百
丈壁開鑑塘濯纓井八景歷代名人多題咏焉

晁謙之詩南巖夫何爲山作天倚蓋山南溪山複飛頂覆
其外初如鵬將翔鴈繫羣麓背乍似海獸嘯呀口噉而嘍
當空橫廣額架屋喉舌內嘗聆釋氏說仰覆各世界千間
未可著五畝良不隘清冷氣射人熱惱從此潰崖奔木疎
瘦谷遠鳥幽怪塌予與二子高興偶相戒松舟下清江毛

上饒縣志

山川
卷五

十四

髮數鰕鱗籃輿上峻嶺幢節望杉檜李侯勳門胄文采山
作繪趙君儒林孫娉美蘭結佩不爲城府遊繼此日子邁
甯知老愈拙意在精賞退得居溪南山食飲與山對夔魍
入奧突雲雨出神澮顧此誠未逢欣然與心會彭湖兩崖
蹙泉作一線霈禪月古臺空靈山自明晦平生所驅使詩
酒俱好在天涯得吾侶物外從所快便欲登赤城一觀天
宇大
朱晦菴詩南巖兜率境形勝自天成崖雨楹前下山雲殿
後生泉堪清病目井可濯塵纓五級峯頭立何須步玉京

宋韓元吉詩官曹傳領無時空一春感感塵埃中溪南十里巖谷好俗駕屢整無由窮前時相邀雨斷道今晨不雨天亦風乃知書生不解事向以慳澀勤天公與來邂逅始一往相與縱轡隨飛鴻野棠著子梅杏老密葉尙帶殘花紅崢嶸屋宇吁可怪無乃開闢煩豐隆卻尋危徑山巉絕俯仰曠野迷西東涓涓寒溜滴水雪一酌爲我涼心胸山川何曾歲月計可憐翠阜紛磨礪人生歡笑不易得此會幾許誰能同春禽正喧日已暮歎我歸期遠匆匆

舊志增

李空同詩巖高屯屋巨谷邃至跡罕仰之訝天缺登頓陡

上饒縣志

山川卷五

十五

雲滿木零鷓巢露松冷猿嘯緩一滴聆不厭五級長可踐葉鵠歌天匠雕龍構倏忽沙壤爲鱗石爲骨昂頭指欲排天根蟠旋便已成雪窟嶽崎空洞屯飛屨巉嶙穹窿驚欲下金衣丈六天竺來木馬嘶風駐南野芙蓉翠削山之東披茸踞豹多奇踪五級峯頭蘚封磴登闔縹馬窮鼇龍玉盤承露有餘漉泉根滴滴通靈石煙波到處結奇遊翻吾刻迹詩畱壁美人攜琴坐石旁林橫黛翠如錦張巖浮雲際月窟近秋風散下黃金香樵歌歎乃迷歸路林暉落照巖先暮新礪古錯墨題處正對嶺頭一株樹

以上自四十一都至四十五都諸山舊志

鐵山在縣東南六十里永樂鄉舊常治鐵後塌更名丁溪山
銅山在縣南四十里永樂鄉方輿記云下有天井廣丈餘有
石倒懸如蓮花其水碧色莫測深淺春夏不竭天欲雨井
中即白霧上騰

湖古山在縣南百二十里永樂鄉山巔一池中有龍井江元
帥廟在焉祈禱多應因名其池曰聖塘

錦屏峯在縣南六十里永樂鄉周邨山色秀麗端立如屏其
上平正舊建禹王廟下有周氏天恩堂

上饒縣志 山川
卷五

六

紫草山在縣南七十里永樂鄉山勢崷嶸綿亙二十里中有
古刹已廢

雞鳴峯在縣南永樂鄉周邨兀然挺拔如雞翹首下有宋狀
元徐梅堃故宅遺址尚存

五彩峯在永樂鄉雞鳴峯左五峯疊峙勢如潮湧蔥蘢蒼翠
秀色可人明知府金銑過其地望而喜曰峯嵐多彩色因
以五彩名之

鶯山嶺在縣南八十里永樂鄉高峻紆折垂五里許通閩界

岑陽關

高洋嶺在縣南八十里永樂鄉峻崢高峻升降凡十里許嶺南卽高州

鐵山嶺在縣南八十里永樂鄉路可通閩

斗米嶺在縣南八十里永樂鄉路通閩省相傳嶺有石隙曾出米飯僧故名

岑陽嶺在縣南永樂鄉嶺勢巖業上侵雲表攀躋者肩踵相接江閩自此分界設關戍守

北嶺在縣南八十里永樂鄉其嶺寬廣約百畝居民卽山種藝儼成村落山泉灌溉四時不竭嶺南接岑陽關

上饒縣志

山川
卷五

七

西巖在縣南六十里永樂鄉巖門有石如鐘覆地中有懸石如螺滴水味甚甘冷

以上自四十六都至五十六都諸山誌

大橫嶺在縣南五十里來蘇鄉當入閩孔道山石陡起橫互直出溪澗故名

虎隘嶺在縣南二十里來蘇鄉

冷水嶺在縣南二十里來蘇鄉崖石突起下瞰溪流丁溪南行至是匯爲潭水深而冷故名

七峯巖在縣南二十五里來蘇鄉巖壑奇秀唐淨空禪師卓

錫處巖陰屬廣豐境

木洲山在縣東南十五里上饒鄉山勢截業爲邑治左障

青金山在縣治東南三十里上饒鄉三峯鼎峙鵝峯尤爲秀

拔多洞壑怪石中有漢高帝廟祈禱輒應山陽接廣豐境

秦峯嶺在縣東五十里上饒鄉形勢高聳圓如覆釜一名雞

龍山上舊有廟下爲秦山寺

黃尖峯在上饒鄉接廣豐境山半一巖中祀八仙

青巖山在縣東三十里太平鄉有古寺

明鄭邦福詩薰風長日繞迴廊飯後尋僧納晚涼自嘆俗

上饒縣志

山川
卷五

六

緣猶未竟襟裾空帶積廚香

山虛泉響穿深樾水淨魚痕斷初月兩間物色無人收天

意分畱與英發

黃巖山在縣東五十里太平鄉山半有巖如室中有泉自石

竇出味甘美上有觀音殿潘元帥祠其巔高圓如甌俗呼

飯甌山

以上自五十七都至七十都諸山續

羊角石在靈山北有石岐如羊角

馬蹄石在石人峯下李將軍祠前相傳神助王師討賊馬足

躡石蹄痕宛然時有泉溢出飲可愈疾

宋姜夔詩青壁高懸雲氣堆將軍從此試龍媒至今芳草寒泉外猶似當年破賊回藟

梭陀巖在邑西二十五里高數仞怪石玲瓏作樓臺狀上有泉色黝黑巖口一古井水冽而甘蔭田數十畝旱禱輒靈應又生異樹一本兩株分爲左右左發今年右榮明歲先後不同若交讓木俗以巖名呼之曰梭陀樹蓋勝跡亦奇卉也

霞隴山在城北入都曲折盤旋望如獅子明進士徐廷綬詠

上饒縣志

山川
卷五

九

入景詩取霞隴鐘鼓爲最道光初年徐書升倡修寺宇而徑路崎嶇行多不便徐尙積鳩工修葺復于嶺下建亭焉石壁山在城南五十七都向有古廟祀唐忠臣張睢陽其山周遭皆土中起石脊約數十丈上有一穴深數寸長尺許形如斧琢相傳仙人曾試劍於此

龍井灣石巖洞在城西三十都中有清泉長流不竭歲旱鄉人來禱輒應

仙山嶺在二十三都安輯鄉相傳爲柴姑僵化處同治四年里人醮金重建寺

蜈蚣山在城北七都下有迴龍亭鵲搆橋山出靈泉祈雨屢
驗

龍會山在城北七都巖石奇古中有石竇靈泉時溢或出於
巖中或出於龍井其源令人莫測云

紫籐山在邑南五十五都黃坑橋內建觀音殿文昌宮創於
元季屢廢興

國朝咸豐十年重捐造南行半里許率平岡四周皆土陡起一
石高可十數仞其半空有住仙洞洞旁一小石計丈餘曰
巖山仙石俗傳仙人試劍處

上饒縣志

山川
卷五

三

南呈青山頭在上饒鄉六十四都上有井湧泉可灌數百畝
其井知晴雨天將晴作響水立乾逾時如故天雨亦然
石笋峯在城北九都與靈山對峙旁有仙人橋

螺螄山占鼇山象鼻山與馬鞍山連在城西三十四都毛球
山粧臺山下爲信江砥柱環兩岸而保障中流嘉慶年間
始加鎚鑿嗣後萬斧交侵日復一日逮及咸豐瀕江之險
鏟削幾平所畱片石狀若戈矛同治庚午邑董僉議將公
項向各山主人出金購之稟官立案示禁泐碑關隘屹然
庶幾可保

魚潭山在縣西北廿八都唐代建李將軍行祠於其上額曰顯聖殿廟久圯遺址存

國朝同治八年復建祠於該山之近村置地靈橋閱江亭東有祝家井泉甚大可汲百餘家其西石井涓涓一線味甚清冽俗呼沁脾泉

側名山與興安接壤上平坦如臺一名如臺山山舊有寺故老相傳燬於火遺址存村人立白鶴真仙以祀之歲六月間士民咸如期禮拜遇水旱疫癘禱輒應山上向有白鶴花仙桃實今桃樹已枯白鶴花尙歲時開放

上饒縣志

山川
卷五

三

松巖一名余公巖在邑西三十七都距城廿里許世傳有余姓者隱其中後仙去巖巔植丹桂數株青松萬樹每際仲秋香風四散且怪石嵯峨象形惟肖選勝攬奇稱爲佳境礫峯在邑南五十一都距城百餘里山形壁立中極開朗咸豐同治間髮逆頻經未嘗深入以其地險而人眾也優貢姚景曦有記入藝文

叫石在上饒縣西九十里舊經載元和侍御史許堯佐過石下名之曰走石嘗敘走石說於叫石之側

據寰宇記增

齒巖在上饒月巖雲洞側

據輿地記勝增

纓績石在上饒縣西九十里孤石圓聳獨在潭中高十餘丈

如績麻纓焉故老相傳云織女失纓流至此而止據寰宇記增

石黃山在上饒東南三十五里出燠黃石或採之煉為丹藥

據寰宇記增

大琛山在上饒縣元和申許堯佐為文敘之曰縣有山人見

三鐵鑊可容百斛中生蓮花據寰宇記增

信江唐李翱謂之信河朱子謂之高溪發源三清山麓水玉

洞龍潭曰金沙溪流一百二十里至玉山東津橋上合大

橋溪江山界發源水至玉虹橋上合下鎮溪江山界發源水匯為大

上饒縣志 山川 卷五

三

玉潭即古所謂玉溪水溪者至西濟橋玉瑯溪源出懷玉山麓入磔

龍潭水會焉其流始大西經廣豐界至郡城南門外西南流

經鉛山縣之河口鎮合諸溪之水亦曰大玉潭通志信江最深澄處

過興安縣境經弋陽貴溪縣城至橫潭出郡境經流四百

三十里七邑溪流匯焉在玉山曰玉溪水溪在上饒曰上

饒江弋陽曰弋陽江曰葛溪貴溪曰薌溪隨地異名皆此

水也出境抵饒之安仁縣餘干縣之龍津瑞洪匯鄱陽湖

入江明費宏題廣信地理圖云信之境東浙南閩西北接

撫饒山之大者懷玉鵝湖龍虎皆有聞於天下高溪水貫

其中清澈湍駛志

按一統志云上饒江府治南上流會諸溪下經弋陽貴

溪流入饒州府境卽朱子所謂高溪也前志

唐張祐詩碧溪行幾折凝櫂宿汀沙角斷孤城掩樓深片
月斜夜橋昏水氣秋竹靜霜華更想曾題壁凋零可嘆嗟
李華寄趙七侍御詩并序自餘干谿行經弋陽江至上饒
山川幽麗思與雲卿同遊邈不可得云搖漿曙江流江清
水復重心愜賞未足川回失前峯陵灘出極浦曠若天地
通軍陽青嵯峨開拆混元中九潭魚龍窟仙城羽人宮陰

上饒縣志

山川
卷五

三

奧潛鬼物精光動烟空蒼猿啼深瀧白鷗戲葱蒙飛湍鳴
金石激溜鼓雷風雨濯萬木鮮霞照千山濃草闕長餘綠
花靜落幽紅渚烟見晨釣山月聞夜春覆谿窈窕波涵石
洶溶溶丹邱忽聚散素壁相奔衝白日破昏靄靈山出其
東勢排昊蒼上氣壓吳越雄迴頭望雲卿此憾發吾衷

放生河府南門外鍾靈橋上下一里許知府張國楨設禁網
畧久而弛廢康熙五十年知府周鎔元乾隆三十一年知
府李鏞四十五年知府康基淵疊加禁飭

附馬道畊記廣信府故高溪也由南郭暨鍾靈橋上下

延袤里許前郡守張國楨勒石兩間曰放生河禁網罟
之人積之有年滋生日蕃魚若有知咸趨聚於中喁喁
噉噉以億萬計憑橋楯觀之從容而樂往來者指此不
啻濠梁間張守解組繼之者佯弛其禁以爲非儒者之
務漁之黠與民之無賴競取之而魚又若有知咸趨以
散去亦幾年所矣今太守周嵩山鎔元至復嚴其令漁
盜民竊舉寘之法屬司橋者主守之魚仍若有知咸趨
聚如故易曰信及豚魚聖人豈欺我哉余維太守推人
及物盡我之誠而孚物之應不期而至若有靈然設向

上饒縣志

山川
卷五

二

水濱而問之將曰子非我安知我之不知乎吾當質之
莊生

水磨灘在城西半里許灘石累累至秋輒涸舟行維艱

君遷潭卽龍潭

廿里潭在縣西三十里水深停蓄兩岸石壁如削凡二十里
餘

牛眼灘在縣西二十里中有兩石如牛眼水勢震急舟行時
有觸溺之患

白石潭在縣南二十里來蘇鄉冷水嶺下岸多白石因名

梅潭在縣西四十里乾元鄉接鉛邑界

五里淤在縣東四十五里太平鄉明大學士鄭文恪世居此
鄭文恪詩水流百里忽瓊渚潭樹稠圍五里淤沙圃盡栽
諸葛菜水田飽喫任公魚草堂更在玉山下仙子清分黃
石餘圭里卽今還上世相親箇箇說佃漁

沙溪在縣東五十里

鄭文恪有詩云履聲新輟北門扉詔許沙溪薜荔衣

以上中流大溪水

九股松溪在縣西十五里開化鄉岸有古松一本九榦經千

上饒縣志

山川
卷五

五

百年蒼翠如常故名

靈溪在縣東北二十里發源靈山背德興縣分水嶺下經典

安縣姜李村入縣界經鄭家坊臨江湖流一百四十里至

靈溪入上饒江

明夏言詩纔向龍岡掃墓田靈溪又泛鄭坊船長安十載

松楸夢今日家山聞杜鵑又入靈溪口詩危橋跨水玉

虹流渺渺春波畫鷁浮百里雙溪初入口龍岡山下是源

頭

楮溪在縣西十里開化鄉發源靈山西南流入上饒江岸多

楮木因名或以眾流所會故稱諸溪

靈山水在縣東北二十五里崇孝鄉源出靈山南流百里入
上饒江可通舟楫

宋溪在縣西八十里石橋鄉源出靈山西流百二十里入上
饒江相傳宋氏曾居溪側唐天寶六年勅改爲宋氏水
以上北岸支流小水

鯉洋在縣東六十里大平鄉鄭文恪讀書於此

鄭文恪以偉詩鯉洋堪入龍眠畫更恐幽深圖不窮菰蒲
釣艇雨聲外橘柚人屋炊煙中經年憶此江水綠有客未

上饒縣志

山川
卷五

三

返山花紅京邸裁書寄小阮庭柯無恙予將東

破石水在縣西六十里乾元鄉源出建陽界北流六十里入
上饒江可通小舟

峙溪在縣西二十里源出石橋鄉東流五十里入於永豐溪
可通小舟

瀘溪在縣南五十里乾元鄉水自古良北流入上饒江

古良溪在縣南五十里永樂鄉源出銅塘西流與丁溪合入

上饒江

北溪在縣南六十里乾元鄉宋理學陳才卿故廬有竹林居

址尙存

以上南岸支流小水

以上舊志

合港口在縣南五十一都係三關之水併流處出二十五里

至上瀘又三十里至石溪又三十里至河口鎮

新

生生泉明嘉靖丙午刑部郎中翁大立所鑿舊在行臺廳事

左今以其地創建試院井在頭門內西偏

翁大立記嘉靖丙午予以刑部郎中審錄江西逾年五月至廣信卽御史臺居之將復命從吏皆病疫臺中有怪物狀類狗而大每夜分卽來來卽滄廚具去繚垣無竇局戶

上饒縣志

山川卷五

三

皆弗啟也時信城中亦病疫民間鳴金伐鼓驅疫鬼聲徹昏曉從吏聞之又言有怪物事皆恐恐畏死泣且告予予曰妖不勝德果怪物也卽殺之耳予乃肅衣冠藏燈密室待之夜分果來命隸人遮擊擊數百乃死疫者疑稍解然召醫診視終弗愈忽夢神人語曰君從者病惟天一生能治之明日且至明日爲六月朔也予密起戒門者曰有稱天一生者至毋雷門日晡無報至者予循除散步且疑且思忽堂之西偏有地津津然以物發視至尺許清泉湧出竇從乾方來若瀆沫狀飲之寒且甘予喜曰天一生水神

人告我哉遂命疫者人飲數瓢飲卽愈旣而城中疫者羣
飲之無不愈者予乃命工採石甃爲井或請名之予曰生
者天地之大德仁者人心之生理猶夫泉也生生不息故
地道以泉生萬物聖人以仁生萬民予祇奉德意爲繫者
求生得茹兔者疏請白之法可殺情可原者輕之得不死
其他未減有差皆聖人生之也泉之應殆以是焉顧予淺
陋闇於情款雖蚤夜滌濯以究所謂生生之者猶恐深文
巧致未易繹思使聖人之澤於弗覺泉雖清流或纏矣
名之曰生生泉因以自鏡焉越十年丁巳予以江西按察
使至明年正月擢廣東右布政使兩過之酌而酌曰泉不
負予予胡可負泉也遂銘之銘曰井欲收弗使覆我不潔

泉請竭

收泉在府學門東

方豪銘高不谷卑不溢井其井勿用幕

官井在城隅闌闔坊又名義井宋嘉泰間義門鄭安壽修尋
圯明萬曆癸巳鄭柯翁元助等再建

蒙泉在孔雀院

化雨泉在信江書院內井深澄味甘而冽盛夏不竭善釀者

咸取汲焉

新月池在信江書院後鑿石爲池規如新月檻泉側出大旱不涸

陸羽泉在城北茶山寺唐陸羽嘗寓其地卽山種茶品爲第四其水似井而傍山色白味甘是爲乳泉以土色赤又名燕支井湘潭唐世徵詩生爲茶經累季疵禿衿揚杓亦何辭豈知北郭空山裏占得寒潭雪一池

按歐陽永叔記云羽所說二十水廬山康王谷水第一無錫惠山石泉第二蘄州蘭谷谿石下水第三峽州扇

上饒縣志

山川
卷五

完

子峽蝦蟆口水第四又劉伯翳載羽爲李季卿論水次第有二十種伯翳以揚子江爲第一惠山石泉爲第二虎邱石井爲第三丹陽寺井爲第四皆不及信州麤脂井列之第四好事者所附會耶考茶經祇載山水上江水中井水下其山水揀乳泉石池漫流者上其江水取去人遠者井取多汲者初不著次第而此水似井而傍山色白而味甘殆乳井泉乎當仍舊志曰陸羽泉不當以第四之名溷之屈之俾博雅者貽誚

聖井在永樂鄉湖古山方廣一池中有井深不可測宋大觀

間歲旱江元帥道成於此嗣後雩禱獲鱗介之屬輒雨相傳井有七竅或通閩或通洋溪澣或通孟嘉源井

九井在高泉院四時不竭今皆廢止存一井在佛殿前寺僧架轆轤其上取以供茗

銅塘井在永樂鄉山勢幽邃欲雨則雲氣蒸騰旱禱輒應井有九登其三則險阻其六不能復深入矣

白龍井在石橋鄉有白龍太子廟

孟嘉源井在永樂鄉

泉洋見水利志

上饒縣志

山川卷五

三

以上水之出於池井者

鐘石灘在縣西八十里灘畔有巨石如鐘

老虎灘在縣西三十里開化鄉灘勢險惡故名

按前志載此灘在縣西三十里而府志則云十里但查饒境無此灘名則此灘疑是鉛境葉青州下者與鐘石灘俱爲鉛山境而饒邑誤載之姑附識於此以俟考核焉

按山川錯載查考維艱茲一一釐正山挨都彙次水分南北中三條庶幾便於觀覽云

以上舊志

阨塞附

廣信府當入省之衝四境迴遠旁多深山大谷府治雄壯城周七里南濠因溪帶以天塹北西東濬濠深可丈許廣四之三金湯之固恃以帖然封禁山險絕陡峻障互東南而饒之靈山岑陽芈陽玉之草坪峽口廣之柘陽磁山二渡鉛之車盤分水温林弋貴之巴坑鷹潭江潞天花二山與之橫峯均制勝要區也

上饒東則沙溪路通閩浙玉山要道西則芈陽山勢峻絕其險可守石溪坊鉛山要道南則岑陽與閩接壤爲南要區

上饒縣志

阨塞
卷五

三十一

北則鄭家坊踞靈山之下足資保障而要害尤在封禁一山云

封禁山一名銅塘縣南百里近接五五十二三四都廣豐之十五都玉山則相距二百里不相聯界前志謂屬上永玉三縣者非歷代封禁今設高洲源口船坑三汛防守順治十年江西巡撫蔡士英封禁山疏 順治十年正月初四日准工部咨將封禁山有無出產木植查明具奏等因隨查據布政使盧震陽湖東道楊國正具詳查看得封禁山原係封禁山初名銅塘因其峭險歷爲盜藪削平之

後卽請封禁由來舊矣唐代黃巢倡亂僞賊借勢流毒一方繼而葉宗畱賃居燒炭覘險立穴鑄冶甲兵謀爲不軌而鄧茂七爲之附援三省搖動幾危信州此前鑒昭然而有據也目今山賊楊文蹲踞其間未經蕩平今一旦輕議開採是啓奸人之亂謀耳况其中所產木植不過臃腫樗櫟原無合用之材兼以巉巖險峻猛獸叢居溪澗不通道路曲折不但開採有百害而無一利且恐徒挑釁隙而無實效等因據此臣伏查封景山卽封禁山界連上饒廣豐二縣距玉山縣尙二百餘里歷代以來皆行封禁粵稽舊

上饒縣志

阨塞
卷五

三十二

籍議開數次然卒以無佳木可採有害於民而中止臣躬歷查勘見其峻峯峭壁溪澗之水不通外流且毒螫猛獸聚以爲巢附山百里人烟杳絕卽所產者盡係良材亦且人苦於登攀木難於出水況所產不過松楓檮櫟並無棟梁者乎若開採一行其徒費金錢罔裨實用猶可言也誠恐驚魂甫定之赤子一經騷擾其害更有不可知者抑猶有慮焉此山昔爲鄧葉諸寇盤踞後來大費兵力矧今湖東山逆楊文等正在會剿依巒負嶠尙繁有徒方苦搜殄之難覓若此幽深險峻夙稱盜藪之處今日一啓其釁將

來恐難收拾此開採之害更彰明較著者伏乞俯查往事
軫念地方嚴飭封禁安民戢寇兩得攸賴順治十年二月
初九日奉

旨採木有害無利以後不許妄請該部知道欽此

乾隆二十一年江西巡撫胡寶琮查勘封禁山奏請永禁
疏爲勘明禁山應行永禁情形並現在辦理緣由仰祈

聖鑒事竊

臣

於二月十四日起程赴廣信查勘封禁山由陸路

星馳前往於十八日由廣郡之上饒至廣豐縣入山復轉
至上饒縣所轄境內將山勢隘口土色樹木及舊設汛地

上饒縣志

阨塞
卷五

三十三

細加看詳審度查此山原名銅塘山週圍約三百里與閩
浙連界而入山之徑俱在江右地方上饒縣設三汛曰源
口曰高洲曰船坑廣豐縣設三汛曰磁山殿曰下霧嶺曰
小峯由各汛而人行二三四十餘里不等抵極峻之隘口
爲原立各禁碑地方約計禁內不過百里由禁界入山皆
係重巒疊嶂絕壁懸巖其適中之處名曰銅塘卽山所由
得名間有零星平地俱屬無多其樹木並無良材臃腫糾
蟠蔚翳於峻嶺幽壑之間而山趾錯接多隔澗溪水漲則
瀰漫無路山徑壁陡攀藤援木方可登陟而一線懸通數

武曲折彼此卽不相睹且地皆砂石非裹糧無以爲生惟禁絕其入山之路始可肅靜粵稽前代無不封禁以防姦宄間有建言開禁者勘明卽寢其事 國初仍舊封禁嗣經原任侍郎臣趙殿最前撫臣陳宏謀兩次請開經三省勘明應仍舊制而近年復有議開者蓋亦以自然之利可資墾種可採木植可煎礦砂皆未嘗身親目覩遂疑環山之內當有沃壤平原不知旣無可墾之地亦無可用之材挖土試驗又無礦苗惟崎嶇險峻藏姦徒則難裹糧搜剔招張夫衆亦恐聚議紛囂官辦則糜費無益民辦則貲

上饒縣志

阨塞卷五

三十四

本難酬且其勢必添駐文武弁而建署無地貿易不通斷難孤處巖壑總之禁則並無棄利開則必有遺害嗣後永宜封禁更無可疑惟稽察之法必加嚴密始無偷入竊墾以致日久復成匿匪之所臣飭府縣另立高厚界碑鐫刻大字於隘口當中設立其入山之禁皆令各就地勢界以藩籬俾禁地瞭然而稽查亦易卽著落附近之棚長看守並將各隘口指定六汛分管以專責成其駐劄該處之巡檢把總不時周流巡視每年令道府分季稽查縣營分月察看務令遵照舊例不許陽奉陰違至向因山徑未塞

附近居民棚戶或竊入樵採嗣後槩行嚴禁以杜其漸而
佃種人戶間有倚傍山坡崖搭棚居住者多係閩人姦
良莫辨最易滋事應令搬移禁界之外倘有假稱山主招
集容留者卽行嚴究如此則仍舊封禁益見界劃分明而
防查嚴密亦不致日久廢弛矣所有臣親行查勘永應封
禁情形並另立禁碑一切辦理緣由理合恭摺奏明仰祈
皇上聖鑒訓示謹奏四月十八日奉到
硃批如所議行欽此

伍諾璽請罷弛封禁山議詳 爲奉覈勘議事該卑府遵

上饒縣志

阨塞
卷五

三十五

卽率同上饒縣李文耀廣豐縣游法珠於乾隆十九年十
一月十二日進山至二十一日出山伏查封禁一山北東
西三面皆卑屬之上饒廣豐二縣所轄而南東西則係閩
省之浦城崇安所隸而廣豐又有小徑一可通浙衢之江
山常山二縣一可通浙處之龍泉景寧二縣三省咸資屏
蔽且其間層巒疊嶂險僻陡峻舟楫不通人跡罕至往者
萑苻嘯聚穴坏胠篋之徒譟呼亂行載之志乘班班可考
我 國家以德綏猷絕域風行俾海隅羽族卉儀款關來
廷使驛四通百於前代以此彈丸黑子之地原無庸踵循

封禁之名以彰王者無外之化但思歷來所以封禁之由蓋緣野無可開之田地無可產之利而深山窮谷實爲藏垢納污之所與其他弛禁有莫辨之姦良不若封禁靖地方而安民生職是故也今卑府與該二縣等身履其地雖遠必入雖險必冒雖幽僻必達詳加查勘查上饒縣由高洲汛至范家坳民山五里內山岡立有封禁界石進界內山勢深邃樹木陰翳先至西坑余坪地一帶地方查勘西坑內有平坦小塘形一區丈量止有一分一釐零余平地亦有平坦地二片丈量有一畝四分零三接嶺銅塘岡山嶺

上饒縣志

阨塞
卷五

三十六

陡險摩磴如蟻廟基地雖稍平坦然丈量僅有七釐零入銅塘心爲禁山之腹心重巒複嶂最易藏奸且地氣旺盛若一經弛禁必滋不軌之謀況丈量大小平地四片僅止畝餘斷難設官建署而銅塘心孤懸山奧卽弛禁設官亦不能彈壓稽查自西坑起至銅塘心除丈量平地外餘皆根株蟠結半係沙石無所施其伎倆均無如議者所云臨溪者約可開田二百餘畝平原者約可開田四五百畝之多也又自銅塘心循至羊角尖鵝頸嶺其山形勢豐上銳下偃仄難言兩旁山坑自上望下渺不可際且亂石磷磷

亦不能開地二百餘畝之多又有雙溪口沿溪而至橙樹坪二處地方雖屬傍臨山澗但地夾砂礫樹根糾纏又奚能墾田至二三百畝之廣由五里排而至石塔坑幽谷曲隈間有平行之處其地亦不過丈量一十餘畝實不知覬覦行私弛禁公溥之議者何所見而云然也夫自范家坳禁界起至銅塘心自銅塘心而至石塔坑地方禁界止在登陟嶺際臨上而俯視絕壑萬仞杳莫測其所窮肝膽爲之悼慄且更險惡者又莫如老鼠摸壁路容半足諦視崖壑深不可測失步尺寸墜輒糜碎如此巉巖峭壁之險瘴

上饒縣志

阨塞
卷五

三十七

霧晦冥之地何其輕言開闢如此易易也又自源口進至柯樹嶺入寶岡崇山峻嶺固難墾闢卽楊梅地李子坑亦地止一窪卽可開墾亦屬無幾螺螄尾立有禁界其下卽一封書又名葉芳舒及芋荷坑凡山頭地角靡不開種殆盡況又係界外之官山也又自上會坑民山進至燈盞塘立有界碑界內全未開動至袁同知所議箬碧尖可以盡開者勢更難行蓋箬碧尖係屬石山高插雲霄可望不可及非惟卑府不能躡其嶺際卽登山輕捷如猿猱者亦裹足不前也其次至廣豐所屬脫衣塘原係禁口現有查出

界石該處微有開動自脫衣塘至龍門坑蜿蜒而下高山環繞現墾山地亦屬無多至廳基地方覺稍平坦已有開墾廳基一逾山澗卽上饒封禁之箬碧尖也磨刀塢雖屬臨溪或有可以開墾之處亦未可料然藜莽叢塞難以勘量至坳頭山旁鑿有禁界界內師公墳高低畝側零星私開田地數十餘畝其餘悉皆亂石實無可開之地大東坑亦約有零星開田至百餘畝但就地開種不成片段半坑小東坑均未開動至虎尾岡立有段界山勢高入雲表不測其仞行者如臨冰淵自虎尾岡下至洞門底禁界遼寬

上饒縣志

隄塞
卷五

三十八

幽邃筆難殫述洞門底亦有零開田地共二百餘畝該處查有封貯之木六百零一株但未見封貯五萬餘之柴詢之該地練保曰未曾責令收管也詢之游令曰未見封貯榜文也其餘如龍王殿雙溪王瓜坑九井等處無路可通似此絕域荒徼類非人境縱有膏腴繡壤在其中亦棄之如敝屣而況懸揣有田可開有地可闢者也至於該二縣禁內樹木比比皆是蒼蔚菁葱若積黛遠望疑不可入又未易更僕數也惟有望洋而覩若非神輸鬼運斷難輕出根株蓋無水路可通人力又不能施現如龍門坑洞門

底二處所伐巨木委置如山任其朽腐無計可施以上卑
府逐細確勘徹始徹終悉心籌度實以爲弛禁一道有損
無益蓋其說有五夫深山窮谷瘠地荒區一旦弛禁是必
招民認墾若本地有力之家斷不甘以有用之財而填無
窮之壑或異氓認墾率皆無業窮黎挈妻攜子呼朋引類
深入重山厥廬惟崖厥炊惟坎厥寢惟磯始焉力作久無
利益糧饋難繼人聚嗷嗷變起不測惟時盡撤三省之藩
籬此通彼達其負山固岨江省搜捕緊嚴則竄伏閩浙閩
浙捕治急迫則潛逃江地必致騷擾鄉閭民不聊生此不

上饒縣志

阨塞
卷五

三十九

宜弛禁者一也若謂弛禁可以開地若干開田若干伐木
變價若干可增國賦若干鑿鑿乎皆不刊之見有用之
言也然不知我

皇上每於水旱之灾捐賑不下億千百萬水利城垣等費不下
億千百萬免追免徵之條不下億千百萬寬大之政萬古
爲昭何在乎遐荒絕域之中而直爲之廩廩也況弛禁而
山內可墾之田有限可闢之地無多可取之利無幾所得
不償所失此不宜弛禁者二也卽或弛禁斷伐樹木不知
閱幾何歲月開鑿岑麓而又爬剔其壅且淤者更不知歷

幾春秋實難屈指而懸望其奏效也況遠方承聖者斷未
有挾貲而來必官先借給工本矣弛三省之屏障勢必設
官添兵駐劄彈壓矣添設官役勢必設造衙署議增俸工
矣而山路崎嶇陡澗病涉勢必開平道路或設舟楫或成
輿梁矣是弛禁未見種種毫釐之利益而先費無窮有用
之國帑孰得孰失瞭如指掌此不宜弛禁者三也再者招
徠之人趨利如鳧日繁有徒則命盜之事勢所不免然盜
賊必立時擒捕人命必立時相驗似此深山窮谷之中驗
勘緝捕往返難期姑就上邑而論如高洲至范家坳經歷

上饒縣志

阨塞
卷五

四十

十八道山澗又自石塔至雙溪口又涉溪河十八處該二
處地方均當陡澗深溪之中春夏之交山水驤騰巖巖東
隘衝激飛沫思冒險以涉卻斷斷不能身在險阻之地人
既不能出又不得官役多人何以堪此而登陟之勞亦不
可窮狀如三接嶺羊角尖鵝頸嶺諸嶺高數百尋石棧峴
岑一至其巔咸皆面矜口吐步行不可肩乘竹輿前後必
須用布裹縛上山各各挽布魚貫而行猶如舟子牽纜然
方可直上下山亦需布垂若一人怯步眾則顛躓跋涉既
苦艱難辦公未免需緩則屍身必至潰爛兇盜必至遠颺

官累民害莫可勝言此不宜弛禁者四也且廣信壤地福小尤江右之瘠區一年所產米穀不敷一年之食全賴外運接濟一經弛禁荒地必召墾伐木必召商盈千累百聚雜多人姑以千人論計口而食每人每日需米一升則一日需米十碩百日需米千碩以此類推什伯倍蓰在時和年豐之時或可相安無事儻遇水旱不齊之年閭閻蒼生曷能安堵是開疆拓土有無成效尙在遙遙莫必而將坐享百餘年封禁昇平之民先有向隅之泣此更不宜弛禁者五也之數者卑府與該二縣等守令茲土審時度勢反覆熟籌苟上有裨於國計下無擾於民生中無累於有司何憚而不爲何樂而不行今旣真知灼見且咨於眾咸曰有損無益敢不據實直陳仰請封禁則三省億萬生靈萬年無疆之福胥慶再造之恩矣

按此山名隸廣信實三省交會之所正北接府屬上饒

縣之五十五十二三四都廣豐縣之十五都正東接浙省之龍泉江山等縣西南接閩省之浦城崇安等縣山勢巉巖峭峻攢聚森羅周互三百餘里徑路險仄石棧崎嶇中無平田曠土足任墾藝毒螫猛獸聚居良民不

可託足盜賊則利於入險結巢四出標掠往日鄧茂七
葉宗畱楊文皆流劫盤踞非於中構謀起事也其產率
枳棘楓櫟靡腫不材止可燒炭土人名之曰雜木質重
入水不浮而又無路可出其礦利則厯勘並無礦形亦
絕無銅鐵砂苗前代所云內饒材木礦砂者皆賊徒倡
名煽惑利誘良愚外人不能深入聞風惴息是以有此
舊志所載奏疏皆規切當時無補於今日李鴻考畧亦
止參稽志乘雜採傳聞非有確見難可徵實今寇氛永
靖文武吏比歲入山巡查一一得諸躬親目擊非復向

上饒縣志 卷五

日懸揣臆度矣惟謹斥堠嚴外匪未雨綢繆計不容弛
耳謹載 本朝蔡胡二撫軍疏及伍守議詳於前以資

慎固封守者之一覽焉府志以上前志

擬陳封禁山利弊稟稿

王賡言

大人閣下敬稟者竊查卑府所屬封禁山界連福建浙江

二省周圍約計三百餘里重巒疊嶂密菁深林前代以來
恐其藏伏奸宄屢行封禁我

朝因之不廢向於山口要隘額設塘汛十六處用資防戢歷
任 撫憲於到任閱兵之便九江總鎮於每歲秋冬之時

又皆親詣山中細爲搜查所以詰奸暴而靖地方者立法至爲良善然而車騎遠莅未能久停壁壘徒新不無虛設卑府承乏有年時爲籌度雖不法之徒尙無蟻聚而牟利之輩時有狗偷蓋防之未密固不無疎失之虞而責之過嚴轉深其彌縫之術是以利不貴乎能興也而貴乎不棄害不在乎能防也而在乎能除伏惟

大人明足以察事機勇足以持事變卑府職任守土志切安民於此而不舒心膈之言除地方之弊負

恩滋疚莫此爲甚敢將其可慮者及宜速開者數條爲

上饒縣志

阨塞卷五

四十二

大人縷陳之夫封禁者所以戢奸也然戢奸之法必使其無藏奸之所而後奸不得而生今乃置此險阻之地爲其逋逃之藪官之耳目難於周知卽偶有地方正人從而過問非斥其挑禍卽瞋爲詐財設有不逞之徒暗中糾結人孰從而察覺之此其可慮者一天地生財所以養民今環封禁而居者藉山隣之名目將附近土壤私行開墾附近林木私行摧燒以所得之資結納汛兵書吏相爲壅蔽官府魚肉困窮是以富者日富貧者日貧而封禁一山遂爲土豪之利藪此其可慮者二方今

政治清明海宇寧謐凡係巨憝元惡斷無收匿之家然而往往不以時獲何哉夫州郡交錯之地小有干涉卽在通衢尙且彼此推諉況茲山路徑叢雜交通漸閔在在可通出入彼人所難測設防緝稍懈安知不復行竊出此其可慮者三夫能除此三弊也則六利興焉矣我

國家德教覃敷凡漢唐所未賓服者罔不率俾區區中土彈丸獨爲

王化之所不及是

聖德足以光被四表而不足以動一隅無是理也此其宜於開

上饒縣志

阮塞
卷五

四十四

墾者一封禁山中如銅塘樺桃坑黃茅崗黃瓜坑李子坑等處向所稱爲陡險者皆奸人汎兵之詭說耳卑府屢行

赴勘雖道路崎嶇然皆係土山開墾之後便成坦途況山中在在皆泉其平行處借資灌溉卽有奇零處所亦可栽種包穀蕃蕓及茶子竹絲等物非石田可比且封禁已久土氣甚厚倘遇豐年所獲必倍三五年內按畝升科庶山澤之利不致廢棄此其宜於開墾者二廣信一郡土瘠民貧終歲勤苦俯仰不給者多倘有可資衣食之處不須號召自然雲集第必使貧者邀

格外之恩富者無專利之舉此山一開可活窮黎無算不至糊口四方此其宜於開墾者三若夫開墾之後田野闢人民聚移文武員弁藉資彈壓駐紮其中編設保甲互相稽察則奸宄無從託足自可無意外之患是無封禁之名轉有封禁之實此其宜於開墾者四伏查封禁山所設營汛額兵共七十二名其間認真緝捕者雖不敢謂盡無其人然皆大吏將至始一赴汛平居則招攬奸民共圖私墾者十之六七營員以爲在汛遂不復令其操習技藝虛糜糧餉毫無實用開墾之後自宜飭令歸伍則兵丁有操練之時

上饒縣志

阨塞
卷五

四十五

而城守有捍禦之備此其宜於開墾者五凡開礦開廠先事則必有招來民人之資借給口糧之用及其散也獷悍之徒無術以馭之每易滋事今則不然以本郡之民開本郡之山地既非遙人易爲力凡此費用無藉籌謀樂業安居不同游騎至於建設木城及文武衙署修理道塗搭造民房採買枋木似足備用是

朝廷無經費之需而閭閻有豐恬之象此其宜於開墾者六

卑府

雖甚庸愚豈不知更變之爲難創舉之不易然而竊有念於興利之利其利猶小除害之利其利滋大夫稂莠

既除嘉禾自生道路能通耳目更遠敢不直據衷懷以仰副

大人公忠體

國之至意至於前人之謬說世俗之僞言不揣固陋爲之指其瑕疵酌其可否續呈二冊再呈

電覽伏乞 裁奪訓示

按廣信府禁山與浙閩二省毗連袤延三百餘里約其界址江西居十分之七閩浙二省居十分之三浙屬江山縣界閩屬浦城崇安二縣界江西則上饒廣豐二縣

上饒縣志

阨塞卷五

四十六

界其山外嶂險峻內尚平夷泉多土厚盡可墾種前經兩次請開一奉

部駁一經

上憲批止賡言莅任以來親往相度並於同城之營縣及通守汪正修詳議欲具稟

撫憲面奏請開且擬於中央銅塘地方建設木城移廣信通判及一千總駐紮其中招募的實人戶指明地段承領開墾如果辦理不善賡言情願身任其咎計議已定適江西有查辦逆匪之案而賡言旋又調任南昌事

遂中止深以爲憾謹將稟稿抄錄附刻於書院誌冊之末後之守此土者倘有同心踵而成之則是稿未必不可採擇焉

稟復禁山弛禁經制事宜

鍾世楨

卑府 遵查弛禁之議原以鄉愚避寇入山耕種年久戶口既盛原隰已成該民等費數載之勞得尺寸之土視爲居恆之業藉資養命之源 卑府 前曾親歷該山險夷詳審時勢利害與其強之使出轉恐失所爲非曷若施之以恩俾令力農守分第以數百年禁令一旦更張誠如

上饒縣志

阨塞
卷五

四十七

憲示自應徹底查勘熟籌經制必須事無窒礙方免貽患將來如奉查山之縱橫及在江西地面并屬閩浙兩省各若干里與夫界址村落戶口田畝竹木溪溝道路遠近等因 卑府 伏查誌載山周三百餘里溯自唐代以後閱年久遠歷有侵占原定界址無從稽考今昔迥異遠近判然茲就所歷計之周圍不過一百餘里縱橫各三四十里不等山之東北以至西北皆上廣兩縣所轄內隸上饒者四十餘里隸廣豐者三十餘里東南屬之閩省則居山之陰面半屬峭壁懸巖正東屬之浙界則相距較遙均無里數可

計凡與閩浙相通要隘從前皆有卡所以分疆域上廣兩縣毗連之處向以山內大河沿爲界山民棚屋半在山腰地多砂礫雖種竹木不成茂林間有溪溝僅資灌蔭如遇亢旱仍難久注所有通達路徑里數戶口村莊頭緒紛繁現已另摺開呈伏祈

憲鑒又奉查弛禁以後如何量移營縣管轄或照舊定地段并田土可否升科等因查禁山以內原設四汛駐守巡查上饒向歸高洲外委及八房巡檢專管廣豐厯由城守外委兼管現既弛禁則山內民人與各都土著無異上饒

上饒縣志

阮塞卷五

四十八

地面較寬卽以高洲外委移進銅塘駐紮其廣豐山界較狹仍歸城守外委兼管以節糜費兩縣汛兵照舊巡查是否可行伏乞

憲示至所墾田土多在層巒疊嶂凹凸參差逐處勾稽驟

難蕺事

卑府

仍再督飭王黃各令帶同熟諳經書弓手詳

細丈量總期無漏無遺不敢草率了專容俟丈明分別等則科算另行開摺稟辦茲將戶口村落及道路遠近里數清摺各一扣先行稟乞

大人俯賜察核再禁山圖說現於另稟呈送合併聲明肅

此具稟

稟請銅塘山弛禁稿

王恩溥

卑縣
昨奉

憲台札開照得本道業於本月二十五日按臨信郡查辦保甲事宜惟查該縣所屬之封禁山地方深山窮谷最易藏垢納污難保無齋會匪首潛入其間煽惑愚民若不認真逐一清查誠恐遺爲後害合亟飭令該縣會同高洲汛額外委涂人貴前往封禁山口及界牌地方認真編立保甲并造具戶口清冊以憑查核等因奉此

卑縣
遵卽會

上饒縣志

阮塞
卷五

四十九

同高洲汛額外委涂人貴馳赴封禁山口及界牌地方挨門逐戶認真編查業經張掛門牌并令造具戶口清冊旋於本月初二日由范家坳進口查禁山內上廣二縣向設塘汛有兵常川駐守其山勢周圍約寬百里高阜處所種植茶樹山薯雜糧等物低窪之地盡屬稻田或傍崖爲屋或砌石成蹊谷口崖腰人烟相接有自嘉慶年間入山者有自道光年間入山者迨咸豐年間又有因髮逆滋擾避亂入山者其鄉間住屋迭遭兵燹不得已遂於禁內爲家歷數十年之久上饒所轄不下六百戶廣豐不下二百

戶老幼男婦眾至六七千人所居之屋門扇板壁大都結構可觀搭棚居者不過十之二雞犬桑麻儼然村落遍山尋視自西坑以至余坪地銅塘心沖天燭羊角尖鵝頸嶺雙溪口橙樹坪三接嶺石塔坑一帶層巒疊嶂之中并無深林蒼蔚怪石嵯峨肩輿負擔路徑可通惟七星尖九井山老鼠摸壁三處巨石嶙峋勢難開闢而山腳之種植亦多其餘則田之有可闢者開之殆盡地有可闢者闢之靡遺蓋緣歲月已久人力眾多其所由來者漸也

卑縣暨外

委涂人貴悉心查勘目擊情形恐有齋會匪首混跡其間

上饒縣志

阨塞卷五

五十

釀爲地方之害當經傳齊居民等飭令遷移出山該居民老幼數千人呼天籲地據稱伊等均係良民不但不容齋匪亦並無吃齋之人歷年種山爲業身家性命所關今一旦棄而他徙無家可歸勢將饑餓而死填委溝壑男女皇然失措道旁環泣悽慘之聲不堪言狀復經傳諭該居民等現因

閩浙左爵督憲奏明齋匪餘黨潛匿封禁欽奉

諭旨江閩兩省會兵搜捕

憲台不日督兵進山該居民等既驚且幸僉稱

憲台仁慈愷惻念切痼瘼曩年駐師廣豐士民愛戴伊等
聞之最稔今此之來定是福星天降擬俟 蜺旆莅臨羣
相乞命願具甘結界內並無齋匪等語 卑縣 伏查該居民
等均係本地籍貫并無外方雜處亦無吃齋爲匪情弊詢
諸各都紳耆均無異詞附近五十五十二三四等都紳民
并願出具禁內皆係良民實無齋匪甘結且本年春間紳
耆聞崇安之警亦多赴禁山避盜旣爲避盜之區其非藏
盜之藪已可概見當此籌度萬難之際若聽其安居界內
固干例禁如驅諸界外莫獲棲遲將保甲亦無憑查辦界

上饒縣志

阮塞
卷五

五十一

內旣不能容身界外又無可託足山有屋而將毀田有稻
而未收瓊尾流離哀鴻磬澤 卑縣 身膺民社不忍見其疾

痛顛連因於無可生法之中作或有生機之想查封禁之
田向因墾種有限利益無多是以議開議禁各持其見據
今日之情形而論可以弛禁之道其說有五蓋向者臃腫
鬱盤藜莽叢塞人跡罕至易於藏奸所以弛禁不如封禁
之善今則樹木已斲伐矣岑麓已開鑿矣卽如禁內諸山
向稱箬壁尖石壁千仞高插雲霄可望不可及今亦有路
可通循山而下直達廣豐所轄廳基地方往來者絡繹不

絕山失其險迥非昔比似可弛禁者一也從前荒山未闢
溪漲不通議者輒謂承墾必須招徠不知費多少工資墾
流必須疏濬不知閱幾何歲月今則鱗塍環繞開田已千
餘畝之多且澗溪之水由九井山發源曲折縈紆順流而
下直通大河佃人引爲灌溉雖當此天氣乾燥源流不竭
良苗美蔭旣不煩招民認墾亦不必費力挑淤似可弛禁
者二也況夫小民以食爲天高原之實纍纍也下隰之苗
芄芄也該居民等力作有年計一年所產米穀雜糧不獨
敷一年之食其儲積盈餘且可運濟外間是踐土食毛在

上饒縣志

阨塞
卷五

五十二

該民旣無惰游之患而通功易事卽眾民亦無虧乏之虞
竊以爲有利於民不如因利而利下聚民生上增

國賦似可弛禁者三也而且封禁一山爲江閩浙三省屏障
向來地勢極其巉巖人烟杳絕匪故易入現在地多平坦
生齒殷繁匪斷難藏祇以愚民無知私人禁內不能姑容
者泥於成說也不得徇庇者格於成例也然而羣相聚處
匪伊朝夕屋宇在其中田產在其中今一旦挈妻攜子四
顧荒涼該民等自知違禁不敢不愬然舍去特恐日久稽
疎或邊界游民或遠方流寇窺矚膏腴乘虛竊入其害更

不可勝言與其封禁以移民徒有屏障之名不如弛禁以安民藉資屏障之實似可弛禁者四也抑尤有說者或謂弛禁必設官添兵駐紮彈壓緣居人既忍難保無釁隙爭端設有命盜等案驗勘緝捕往返需時不知該居民等相安日久禁內舊設塘汛足資彈壓且額另外委近在高洲汛地亦可移駐禁內更不難周流巡緝卽縣城相距亦不過百里由鐵山高洲等處可到禁山之路四通八達跋涉本不甚難馬腹鞭長奚足爲慮似可弛禁者五也之數者卑縣與外委熟籌均係實在情形所有奉委查勘禁山並

上饒縣志

阨塞卷五

五十三

無齋匪緣由理合詳細縷稟再飭該居民等趕造戶口田畝草冊附呈

察核愚昧之見可否

俯准轉詳

撫憲據實具奏伏乞

大人訓示遵行

稽查銅塘山稟稿

蔣繼洙

敬稟者竊

卑府

於上年臘月十三日接奉鈞批以飭查銅

塘一山如果實難分身緩俟明春前往亦可務飭上廣兩

縣隨時稽查使外匪無從潛匿是爲至要等因本應遵照辦理惟現在已值封篆期內政務較爲清簡自可不必拘泥以免再延時日卑府遂於十二月二十二日輕輿減從由郡起程自上饒所轄之冷水嶺鐵山街進口連日由橙樹坪雙溪口羊角尖銅塘心箬碧九井渡河至大東坑廳基等處週歷搜查復自廣豐所轄之脫衣塘一路出口取道回郡察看沿途所過地方風俗恬熙人情安謐編查保甲亦復認真此則近日小民仍安耕鑿之大概情形也卑府伏查銅塘山一名封禁本爲三省交會之所其地約廣

上饒縣志

扼塞卷五

五十四

三百餘里如廣豐之九仙軍潭際面坳關刀石滴水巖諸山今之所謂外山者皆在原禁三百里界內其山多峭峰壁立一綫穿雲足稱竒險如唐代之黃巢及鄧雲楊文等謀逆時曾恃以自固故歷代無不封禁迨乾隆年間侍郎趙前撫憲陳兩次議開皆不果行然其時近山棚民往往入內採樵私墾有禁之名無禁之實該山原有舊立禁碑前撫憲胡摺內所稱另立禁碑者實則移之內矣久之棚民移之尤內矣以故三百餘里地面迄今僅百餘里焉山內民人聚至七百餘戶田則墾至九頃有奇已非一朝一

夕之故如咸豐年間髮逆屢經竄境其中並無竊發之徒
城鄉紳民且多人內避亂百餘年來久非藏奸之藪今蒙
憲台仰體

朝廷惠周窮民之意奏准弛禁

卑府

復加體察山民多有蓋藏

絕無匪類潛蹤雖近來戶口不敢添入續行報墾者已屬
不少由此開闢日廣必成沃壤之區由是以觀前此時值
亂離尙不至釀患而承平時可知矣前此爲瘠苦之民尙
不至納污而豐盈時可知矣況前此隨禁隨入漫無限制
尙不至溷有莠民而今戶口有籍田賦有則時更可知矣

上饒縣志

阨塞
卷五

五十五

此又就目前而論可保無虞之實在情形也至該處設官
建汛原爲專司彈壓上廣兩邑山內各有四汛塘兵上饒
歸高洲巡檢及外委就近管轄廣豐則專管者爲洋口巡
檢兼轄者爲城守外委現又欽奉

諭旨飭將兩縣之丞移駐銅塘大東坑兩處此後稽查自必益
昭周密惟詳查該兩處地面略有寬平皆已墾成熟田須
另行勘地建署未免尙稽時日卑府愚昧之見擬請權爲
變通一暫駐鐵山一暫駐橫山殿以便該縣丞棲止巡查
仍飭上廣兩縣趕覓可開之區籌費建署再爲移進先遵

原議換鑄關防以期與奏案相符除督飭上廣兩縣隨時加意稽查以免日久玩生致滋弊竇外合將卑府親自進山巡閱緣由先行稟報

大人察覈訓示再上饒執照業據全發廣豐執照尙未發齊現飭一律上緊散給合併附陳肅此具稟恭請

勛安伏祈 垂鑒

敬再稟者詳查山內現在情形固不至遽釀亂階以後物產漸饒利之所在易起爭端杜漸防微不可不預爲之計此山當封禁之時該縣縣丞外委每屆巡查或以夫價爲

上饒縣志

阨塞卷五

五十六

名藉端需索不肖兵役遇事滋擾在所不免現已弛禁自應一概屏絕但該員弁等倘或不知自愛仍前需索民情必不允服現在章程內開上廣兩縣丞由各縣撥給民壯八名以資差遣多一役雖添一稽查之力而多一役又添一騷擾之虞愚蠢鄉民本不知禮義倘被若輩播弄是非再有莠民乘機煽誘誠恐渾樸之地漸成爭鬪之場履霜堅冰患豈堪問現已嚴飭上廣兩縣破除情面認真稽查遇有前項情弊隨時報明卑府卽當據實具稟請示遵行並於山內烟戶較密處所張貼告示嗣後縣丞外委入山

巡查皆自備資斧不准需索夫價並嚴禁兵役騷擾以杜
亂萌其武弁或不洽輿情汛兵或把持滋事卽令各該縣
稟府仍由卑府移會參將隨時革懲庶可防患未然仰副
大人詰匪安良之至意是否有當伏乞 憲鑒

江西銅塘山會議弛禁勘丈陞科移調員弁分防各
事宜

戶部爲欽奉事江西司案呈本部會議兩江總督馬新貽
等奏銅塘山弛禁勘丈陞科移調員弁分防各事宜一摺
同治八年五月二十日具奏本日奉

上饒縣志

陞塞
卷五

五十七

旨依議欽此相應抄錄原奏恭錄

諭旨行文江西巡撫遵辦可也計單內開

戶部等部謹

奏爲遵

旨議奏事內閣抄出兩江總督馬新貽等會議銅塘山弛禁勘
丈陞科移調員弁分防各事宜一摺同治八年三月初七
日奉

旨該部議奏欽此欽遵抄出到部據原奏內稱銅塘山自唐季
迄元明歷久封禁我

朝因之該山界於江閩兩省自西北至西南與江西上饒縣境毗連正北至正東與廣豐縣民山相接山之東南與福建浦城崇安兩縣接壤兩省於入山各口分設塘汛駐防鎮道府縣按年按季按月巡查道光年間被水貧民入山棲止當派鎮道往查旋各徙去同治五年撫臣劉坤一派督糧道同府縣營汛入山搜捕齋匪並無匪類惟有耕種棚民上饒境內五百六十一戶廣豐境內一百四十四戶悉係附近民人因咸豐年間屢被賊擾入山墾地歷經十四年悉成田疇若加驅逐轉恐失所釀爲厲階經劉坤一

上饒縣志

阨塞
卷五

五十八

據實具奏奉

旨封禁山內既據段起查明俱係耕種棚民並無匪類着照該撫所奏俟閱兵之便進山查勘如果可以弛禁卽行會同閩浙總督奏明辦理等因欽此嗣劉坤一赴廣信閱兵後進山履勘復經附片陳明奉

旨知道了欽此欽遵辦理經臣英桂派委並檄飭延建道督同府縣親歷查勘崇安縣之邛嶺乃江閩交界有開墾小田丈量五畝八分六釐可種禾苗其餘不成邛段共計棚民一百一戶僉稱咸豐七八年避亂入山作苦食力該民均

極僕實並無爲匪原籍無家可歸未便逐出轉爲游民自應弛禁又進勘浦城縣至張村登銅鑄山該山高出江西禁山之上中有小澗爲界浦邑並無禁山地面浙江之江山龍泉慶元三縣並不與禁山毗連第數百年禁令一旦更張已墾山田固應丈量陞科而設官稽察尤須布置得宜江西境內經廣信府知府督上饒縣廣豐縣知縣添派署玉山縣知縣親詣丈勘統計開墾成田者上饒境內計七頃三十五畝三分二釐五毫應陞科地糧銀三十五兩五錢二分七釐隨漕項下正腳銀一兩六錢九釐應陞科

上饒縣志

陞塞
卷五

五十九

米一十五石五斗一合七勺廣豐境內計二頃一十六畝三分五釐六毫應陞科銀一十兩七錢九分七釐隨漕項下正腳銀九錢六分六釐應陞科米四石二斗七升九合五勺均取具印委里民切結開造清冊並每戶發給印照此係官山祇准本戶子孫相承耕種不准私售如願棄業出山赴官繳照另召良民承耕該山旣准弛禁應復銅塘舊名另立都圖查造串冊以示區別此外山地不成片段墾種所得僅堪糊口若一律科賦恐力有未逮查定例各省報墾田地水田以六年起科旱田以十年起科又內地

及邊省零星地土聽民開墾其免科地數江西以不及貳畝爲斷各等語今該山成熟之田或已數年或十數年與甫經報墾者不同請卽以奏明定案之次年入額徵糧其零星地土照例免科至稽察奸宄上饒廣豐進山要口各設塘汛四處仍循舊與上饒縣之八房司巡檢廣豐縣之洋口司巡檢照前巡查免致外匪偷越並將上饒縣縣丞移駐適中之銅塘改爲上饒縣分防銅塘縣丞廣豐縣縣丞移駐適中之大東坑改爲廣豐縣分防大東坑縣丞由縣各撥民壯八名責令專司彈壓並編查保甲核對門牌

上饒縣志

阨塞
卷五

六十

俾免匪類溷跡由縣造具印模詳請鑄給關防以昭信守所需建造衙署經費於善後工程案內一併籌辦並令該縣營每季巡查通判參將及鎮道等官無庸往查以省煩擾其閩邊境以原設各汛地爲界免致兩省交互易滋膠轕浦城之梅溪關鷓鴣張村兩汛由建寧鎮酌委千把總一員兵丁二十名分駐巡防崇安所轄之嶺陽關山均橋坪兩汛由崇安營遊擊酌委千把總一員兵丁二十名分駐巡查每半年更換一次各該營縣半年輪流親往巡查具報以免日久懈生所有崇安境內棚民一百一戶由縣

編入保甲挨填門牌卽嶺稻田五畝八分六釐既經丈量
陞科飭縣造具丁口畝數冊籍呈繳另辦其餘不成卽段
山地照例亦免陞科飭縣畫清界限給予印照此後仍不
准外民擅自入山開墾凡縣營親往稽察按戶清查出具
不敢容畱外匪甘結等語臣等伏查銅塘山封禁始於唐
季迄今已歷有多年溯查封禁之初誠以該山兩省毗連
稽查難期周密奸宄易於潛藏故封禁後分設塘汛按年
按季按月巡查有如道光年間被水貧民入山棲止旋卽
徙去葢封禁之年盤詰奸匪稽察尤爲不易若弛禁之後

上饒縣志

阮塞
卷五

六十一

添撥弁兵賦額或虞不敷倘非佈置嚴密歷久無弊卽使
科賦有賴後患堪虞茲據撫臣劉坤一遵奉

諭旨閱兵後進山履勘該處棚民均極樸實悉由咸豐七八年
髮逆竄擾入山避難開墾多年並未爲匪滋事兵燹之後
無家可歸若令逐出轉爲遊民情殊可憫據查勘江西省
上饒縣計七頃三十五畝二分二釐五毫應陞科地糧銀
三十五兩五錢二分七釐內派隨漕項下正腳銀一兩六
錢九釐應陞科米一十五石五斗一合七勺廣豐縣計二
頃一十六畝三分五釐六毫應陞科銀一十兩七錢九分

七釐內派隨漕項下正腳銀九錢六分六釐應陞科米四石二斗七升九合五勺應如該撫所請俟奏明定案之次年入額起徵其陞科漕項銀米應令該撫逐年添入漕項奏銷冊內造報毋稍遺漏牽混此外不成片段者其免科地數江西以不及二畝爲斷核與定例相符該撫旣開造清冊按戶發給執照務須加意巡查毋許外來遊民入山爭占致生事端其零星山地俟本戶民人墾種旣有成數續行按畝陞科至崇安縣境內棚民旣查有一百一戶之多自應一律編入保甲挨填門牌以便稽查其卽嶺稻田

上饒縣志

阨塞
卷五

六十二

五畝入分六釐旣經丈量陞科應令該督撫以同治九年起徵造具丁口畝數冊籍核實辦理其餘不成卽段山地仍照例免科不准外民擅入開墾並飭該縣營務須按月親往挨戶認真稽查毋許匪徒溷跡取具切實甘結送部查核其上饒廣豐兩縣改駐縣丞吏部查銅塘山旣經弛禁勘丈陞科該督等所請將上饒縣縣丞改駐適中之銅塘改名上饒縣分防銅塘縣丞廣豐縣縣丞改駐適中之大東坑改名廣豐縣分防大東坑縣丞係爲改駐較近地方易於稽查起見自應准如該督等所請辦理至浦城之

梅溪關鷓鴣張村兩汛並崇安所轄之嶺陽關山坳橋坪
兩汛酌委弁兵分駐巡察兵部查銅塘山現據該督等奏
請開墾陞科其福建浦城之梅溪關鷓鴣塘張村兩汛由
建寧鎮酌委千把總一員兵丁二十名分駐巡防又崇安
所轄之嶺陽關山坳橋坪兩汛由建寧左營遊擊就近酌
委千把總一員兵丁二十名分駐各關汛巡查以每半年
更換一次以專責成並令各該營員半年輪流應如各該
督等所奏辦理至半年輪流更換弁兵應令該督造冊咨
報兵部以備稽核俟

上饒縣志

阨塞
卷五

六十三

命下之日行文各該督撫並移咨禮工二部遵照辦理所有
等遵議緣由是否有當理合會同吏兵二部恭摺具奏伏
乞

皇太后

皇上訓示遵行再此摺係戶部主稿合併陳明謹

奏請

旨

同治八年七月初六日江省准咨

以上
新增

岑陽關縣南百二十里與閩之邵武接壤為南境要害之地

撩竹關縣南一百里東甌捷徑

八房塲卽高洲隘縣南八十里在封禁山口山深路阻奸宄

所伏設巡檢司駐防弓兵十五名增設塘汛撥兵戍守

張灣隘在封禁山口舊設快手六十五名今裁

楓林隘在封禁山口舊設快手一百餘名今裁

鄭家坊鎮靈山下縣北八十里與饒徽鄰境人烟輳集設巡

檢司駐防弓兵十五名

平陽寨縣西北百里山形險峻僅通一徑中有田可耕邑人

屢避亂於此唐時黃巢之亂屠戮殆盡土人至今能言之

上饒縣志

阮塞卷五

六十四

石溪坊縣西南五十里鉛山要道設塘汛戍守

封坑口縣西五十里與安要道設塘汛戍守

沙溪寨縣東五十里玉山要道人烟輳集舊設巡檢司明洪

武間裁今設塘汛戍守

以上前志

北鄉鉛石山頂要隘三處同治元年奉 撫憲沈築堡門三

座

鼇頭嶺隘口同治元年奉 撫憲沈築堡一座名鼇峯堡基

址係嶺麓繆姓捐助

上兩縣交界處所坊頭峽腰同治元年奉 撫憲沈築堡一

座名龍津堡

裏外十都交界隘口名三十六折同治元年奉 撫憲沈築

堡一座名虎亭堡

十四都銀嶺與德興交界處所同治元年奉 撫憲沈築堡

一座

十六都柘嶺山同治元年奉 撫憲沈築堡於其上堡依永

世亭為之名永世堡

十六都南峯塘峭壁陡立世傳胡昭隱於此同治元年奉

撫憲沈築堡於其上

上饒縣志

阨塞 卷五

六十五

西鄉三十都石城口同治元年奉 撫憲沈築堡一座

廿二都莘陽關舊有堡牆一座同治元年重修 以上 新增

水利附

廣信府七邑境內複嶂重嶺陵阜盤紆山麓水湄農人苦力

平治成田土黏宜稻粗具邛壠非有平原曠野引川成渠

日瀉潤數百里數十里者也泉源不竭則由高而下層層

灌輸溪流可引則自遠而近節節堵築餘惟資池塘水車

耳陂塘堤堰隨地異名總計二千六百三十有一在額輸

賦二萬五千餘頃之田

盛世一百六萬四千有奇之丁口全倚之為命矣府志

二饒縣以陂名者十有八塘三十有七堰十一壩五湖四圳

三統計灌田六百三十六頃有奇

進賢鄉

和尚陂 灌田一頃
三十五畝

崇孝鄉

橫圍陂 灌田二
十頃
張溪塘 灌田二頃
一十畝
色塘 灌田一頃
四十畝

斗門塘 灌田五頃
三十畝
黃沙塘 灌田一頃
零九畝

明遠鄉

上饒縣志 水利 卷五 六十六

毛塢塘 灌田二頃
一十畝
限時壩 在六都灌
田十頃
柘壩 在六
都

梅堰 灌田一頃
二十畝
萬西山下塘 灌田一頃
七十二畝

石人鄉

際下陂 灌田一頃
二十畝
新塘陂 灌田一頃
一十畝
獲陂 灌田七頃
四十二畝

石梁陂 灌田二頃
一十畝
官圳 灌田三百
頃四十畝

安輯鄉

門塘陂 灌田三頃
三十一畝
張公塘 灌田二頃
七十二畝
楊家陂 灌田九
十七畝

羅家堰 灌田二頃
五十畝
董家堰 灌田三頃
七十畝
螺陂 灌田三頃
七十二畝

社林塘 灌田五頃
五十畝
蓮香陂 灌田六頃
餘
羅陂壩 在二十
三都灌

田四
頃餘

開化鄉

張家塘 灌田一頃
六畝

芝塘 灌田二頃
二十畝

劉湖 灌田五頃
六十畝

董家陂 灌田二頃
二十畝

楊家陂 灌田一頃
一十五畝

沙湖 灌田四頃
五十六畝

楊家湖 灌田三頃
二十畝

長湖 灌田七頃
八十畝

新塘 有二一灌
田一頃又

一灌田一頃
一十二畝

乾元鄉

官陂堰 灌田二頃
二十五畝

石頭塘 灌田一頃
一十畝

傅家塘 灌田八
十二畝

永樂鄉

上饒縣志 水利 卷五

六十七

雞鳴塘 灌田
八頃

赤嶺塘 灌田一頃
九十六畝

菱塘 灌田
三頃

西山塘 灌田一頃
一十畝

黃大塘 灌田一頃
三畝

黃塘 灌田一頃
一十畝

周家塘 灌田一頃
二十畝

陳潭陂 灌田一頃
二十畝

劉塘 灌田一頃
五畝

桃枝陂 灌田一頃
一十六畝

黃沙堰 灌田一頃
二十畝

溪滄塘 灌田九
十八畝

崩塢石頭堰 灌田二
頃五畝

雲洋黃沙口堰 灌田一頃
三十四畝

泉洋 在縣南六十里平地湧
泉若潮溉田數百餘畝

來蘇鄉

湖口堰 灌田九
十七畝

同塘陂 灌田五頃
六十畝

王婆塘 灌田一
頃五畝

常樂塘 灌田七十
九畝

嚴堰塘 灌田
二頃

鱗塘陂 灌田
二頃

原田堰 灌田一百畝

樟樹塘 灌田二十畝

新陂堰 灌田一頃

西坑堰 灌田五十頃

黎州塘 灌田六十七畝

汪家塘 灌田一頃

長田塘 灌田二十畝

上饒鄉

黃巢塘 灌田八十畝

黃土壩 灌田一十畝

烏沙塘 灌田十五畝

源瀝壩 灌田三十畝

破湖陂 灌田四十畝

新塘 灌田十畝

清水陂 灌田十畝

上倉塘 灌田八畝

官塘 灌田十畝

太平鄉

打獵邊圳 灌田三十畝

官塘 灌田七畝

官圳 灌田七十五畝

上饒縣志 水利 卷五

按上饒地屬山鄉土薄水浮高溪直走彭蠡不足以供

涸注所恃唯陂塘壩堰而已小民不能見遠或憚淘濬

之勞聽其淤塞或貪旦夕之利佔為田疇猝遇旱歲以

數家而仰給一勺强者尚能救護弱者每坐視苗稿爭

水斃命往往而有惟在守土者加意區畫修復故道使

界限有定蓄洩有時庶無憂於蘊隆焉

以上前志

簪箕壩在縣南五十八都自東山塢至中灘計百餘丈陰田

約二千餘畝道光三十年為洪流所圯田半淤塞生員饒

瀛等稟請邑侯勸捐修葺壩遂如前

張家
中
楓樹塘大計十餘畝在邑西三十四都灌蔭良田數百頃上以
增新

上饒縣志 水利 卷五

關津附

東關在縣東二里叢桂坊址存

西關在縣西三里闡闡門外泰定坊址存

南關一在縣南上墪三里嘉甯坊址存一在下墪二里開化

鄉水圮址俱沒

以上
前志

橋渡附

平政橋郡南門外浮橋跨越信江用船三十六隻組以巨鐵
索上鋪木板水漲弛列兩岸平復聯合以濟往來初建無
可考宋淳熙元年州守趙汝愚重建汪應辰有記 國朝

上饒縣志

關津
卷五

又六十九

康熙壬寅知府蔡廷輔以舊橋高濶風急水駛改建石橋
易名廣安後圮於水仍用浮橋至庚戌復壞知府高夢說
復建徐旭齡有記壬戌橋圮用渡知府孫世昌重建熊一
瀟有記乾隆三十一年知府李鏜重建易名長清浮橋置
船三十六隻大鎖二條大小錨三十六口貢生紀耀昌汪
煒汪甯遠職員雷錦文楊文錦監生張煥廩貢楊祖仁等
各捐田一十二畝有奇貢生鄭功模龔雷春監生劉仁傑
生員周澍汪光徐樸監生鄭朝抗舒在泮鄭功楷周邦植
鄭功楫等各捐田六七畝至二畝有奇共計田一項三十

四畝五分零以贍修葺嘉慶十九年橋圯知縣賴勳倡捐重修職員鄭飛鵬捐田六畝有奇

鍾靈橋在郡城南明天啟四年知府蔣如奇移橋址於東始建砌石捲洞架木覆瓦命名曰鍾靈自爲記旋圯於水康熙元年知府蔡廷輔復建易名廣安復圯於水三十二年知府崔鳴鶯倡議止成六墩三十八年知府張國楨重建爲石墩十有六大木爲梁費銀五千兩有奇自爲記又觀察佟國勳爲之記雍正十一年癸丑水衝梁浮石墩圯者三之二知府程廷偉知縣陶士儼定議易木以石而難於

上饒縣志

橋渡
卷五

七十

費邑紳士徐鋼王珪周宏基楊必芳張之晉周治王士禧毛廷桂捐金各百呈請檄七邑共勦之議遂定於是盧琪汪元楹吳之純全天爵鄭正官紀耀昌張羽伯諸人會同前倡捐首士督造適程予告去知府陳世璿繼修完工建石洞十有四上鋪砌大石往來平坦自爲記乾隆九年七月六日大水全圯今橋石淪河壩基址尙存

三港橋在進賢鄉縣西南三里廣豐之水北行合於玉溪處清熙元年郡守趙汝愚創建浮橋見汪應辰記今改義渡

諸溪橋在縣西十里跨諸溪宋紹興間郡守林公建章鑄爲
記

按圖志以溪岸多楸木名楸溪或曰眾流之所會也故
從今名明崇正間橋圯推官吳鑄重修自爲記 國朝

乾隆六十年水勢蕩瀾橋漸不支至嘉慶七年士民姜
文燦周長元等倡捐重建署郡守朱鈺爲記

三里橋在郡東三里跨小澗正德戊辰知縣黃希英重修自
爲記 以上
前志

善濟橋在城南二里進賢鄉跨永豐溪舊制石址架木爲屋

上饒縣志 橋渡
卷五

七十一

五十四楹枕溪百餘丈宋嘉定間里人葉君澤捐建真西
山記久圯後置義渡 國朝同治四年紳董鄭樹芳等稟

請郡伯鍾邑侯王給簿勸捐出金輦石廢渡爲橋工成二
載 前志
增

靈溪橋在縣東二十里崇孝鄉舊設渡萬歷癸巳建橋吳嶽
秀記後圯於水乾隆五年知縣汪文麟復修監生張煥董
治之九年七月初六大水橋圯仍爲渡十八年知縣李文
耀首倡貢生張坦監生徐堂吏員王秉信徐時敷董治之
復建石墩梁以巨木覆以瓦屋四十六年知縣程肇豐重

修監生李曰炳捐銀一千二百兩歲久傾圮道光九年改
爲石橋以費缺工停未歲厥事咸豐元年監生李孔坦等
具稟捐貲橋身始砌知府王訓史致諤有記越數年爲水
所壞頻加完葺訖無成功同治八年做郡城浮橋法造舟
爲梁酌移水勢寬平處以通往來並置田善後前志增
通濟橋在縣東五十里太平鄉跨沙溪小澗明知縣彭壽祺
建自爲記 國朝康熙五十一年知縣黃中驥重建自爲
記

龍津橋在縣北九十里石人鄉跨靈山水小溪路達鄭家坊

上饒縣志

橋渡
卷五

七十二

北塘橋在上饒鄉大學士夏言墓道劉必達建

天津橋在郡城進賢鄉西關大街之北跨小溪

以上前志

萬安橋在縣北石人殿下明宏治二年里人毛士珍等捐建

木橋後朽壞雍正三年郡城鋪戶江南涇縣朱邦等易建

石橋併修路百餘丈乾隆十四年被水沖塌涇縣朱栢林

談世美胡世傳重修乾隆五十三年朱安展朱安松胡世

傳朱大茂胡大有復加修葺有記勒碑後復傾圮道光十

六年溫林山捐貲重建

前志增

小澗橋在開化鄉又名楊家石橋乾隆年間周效銓等倡捐

重修邑人丁復有記前志

溪口橋在縣東六十里跨碧母山小溪路通玉山雍正元年

僧實霖募建咸豐年間圯於水同治七年上玉廣三縣紳

董稟請捐造知府鍾世楨有記前志增

槩溪橋在縣北四十里靈山鄉跨靈山水小澗路達鄭家坊

虞路橋在開化鄉西南七里

上宜橋在縣南三十里乾元鄉跨黃沙嶺水小溪路通石溪

五馬橋在進賢鄉

高橋在縣南十里

上饒縣志

橋渡卷五

峙溪橋在進賢鄉以上前志

大石橋在石橋鄉二十里圯於水咸豐九年貢生徐周京等

稟請沈道憲給簿捐修置田百餘畝前志增

鎮坑石橋乾隆二十七年鄉賓劉顯明捐建

濟川橋在縣南十里來蘇鄉

土橋橋在縣東五十里六十八都沙溪乾隆戊寅年余紹裕

捐建

龜墩橋在七十都乾隆甲戌余紹裕重修

渡坎橋在縣東四十里後圯於水邑人鄭世懷捐貲復修前志

金湯橋在縣南二十里六十一都塘底跨古良溪路達洋口
高而安等捐建知縣李文耀有記

長春橋在十四都大東塢乾隆乙未年監生汪騰蛟兄弟捐
建

傅家橋在縣南宋信州教授傅南岡造

凹底義橋在饒北三十里州同徐從龍邑庠生徐錦蛟徐慶

靈蔡國珍倡首積聚置田十畝以為永遠修橋渡之貲路

通江南

章宅橋在縣北三十五里成化元年章敬端捐建

上饒縣志

橋渡
卷五

七十四

章義橋在縣北三十三里章永盛聖修等倡置

章善橋在縣北三十六里

月橋在邑西二十里開化鄉為閩浙往來通衢車馬輪蹄絡

繹不絕前明成化間捲造石橋一洞長三丈有奇濶一丈

四尺高二丈有餘年久水漲兩岸崩卸橋將傾圮道光二

年士人郭明榮等倡修工經一載始竣橋前舊有茶亭一

所僧人四時煮茗以濟行人

以上
前志

雞鳴橋在邑南五十四都花廳界嘉慶二十四年楊朝選等

倡捐重建購山蓄木以備修葺道光二十六年楊德淵等

復醵金購山百餘畝爲該橋暨源口橋張灣橋修葺之費
前志
增

蛇橋在四亂明遠鄉康熙間郭紹富建嘉慶十八年其孫士
炤等重修

王元橋在買粿亭附貢鄭丕顯倡捐重修

西湖橋在縣東四十里婁村鋪附貢鄭逸光建

坵坑橋在縣東吏員鄭顯璿建

接渡橋在縣東五十里沙溪坊

石港橋在縣東三十五里太平鄉監生王奭鄉賓王瑾同建

上饒縣志

橋渡
卷五

七十五

觀瀾橋在縣北萬安橋上流乾隆己巳年江南涇縣談世美
建

通濟橋在鄭坊司署後嘉慶二年廩生鄭文耀倡捐置田七

畝零爲架橋撐渡之費餘貲俟接管增置
以上前志

龍津橋在城南九十里高洲地方爲三關要隘閩地通衢康

熙初年周大潞捐造石橋至嘉慶間被水傾圮旋經周有
默有熙有燕等續架木橋該河發源封禁山相去計三十

里順流八十餘里至葉村洲入大河

碧霞橋在城西四十里二十九都石橋鄉明季架木爲梁

國朝雍正八年鄉飲周球偕趙守堅捐貲改建石橋嘉慶間職員周式鋒謝子達重修

通利橋在城南四十八都鄱陽坂向架木橋乾隆三十七年葉又萃偕佶族沛雲我珍暨僧司懿等倡改石橋耆民葉伯懷首助白金二百兩合眾姓捐貲共計千餘金閱數月告竣知縣王惟一爲作記

羅橋在城西三十七都乾隆初年國學盧瑜建至三十年國學盧錕踵修之

長清浮橋卽平政橋乾隆三十一年郡守李鏞重建易今名

上饒縣志

橋渡
卷五

美

而邑紳紀耀昌等共捐田一百四十畝零歷年由縣經理收租修橋嗣於道光三十年府憲史士良因上邑捐建考棚緣剩銀二千五百兩當撥銀一千兩重建新橋餘銀發典生息咸豐元年至五年橋務均歸鄭釗經理五年三月粵匪圍城府憲袁因餉乏權將此項銀提出一千兩發給兵勇口糧而修橋復費銀二百兩餘銀僅三百兩無何鄭釗物故改歸劉昌詒接管當將此銀置買田畝計收穀四十餘石另立添置長清浮橋戶名六七入等年修費不敷由捐輸局支銀湊補九年又不敷道憲沈諭將公項抽出

大制錢二千緡扣銀一千四百兩以裕修費連前共收銀
一千七百兩疊置田產共費銀一千六百四十餘兩每年
額收租穀共二百九十石零至浮橋舊租穀石咸豐五年
經縣憲楊概歸花紅巷口義渡項下

五村橋在邑北六都道光五年建

觀音蓮橋在芳村道光七年宋欽鑑建

樂善橋在九都桂家道光十年溫林山建

南溪橋在城西四十里潭頭舒肇堯捐建

雙溪橋在城西四十五里石橋鄉邱堪麟捐建

上饒縣志

橋渡
卷五

七

柴山橋在城西五十里石橋鄉舊架木王文忠彭官遠邱堪
麟等倡捐改爲石橋

玉帶橋國學鄭凌波捐建

石嘴橋在城西四十五里石橋鄉向係板橋邱堪麟王有貞

李揚禱等捐建石橋

青雲橋在城北三十里道光己酉年章錦捐建

泌泉橋在城北九都跨靈山水小澗橋左有甘泉

高義橋在城北九都跨靈山水小澗路達石人殿

柴嶺石橋高洲方煥建

永安橋在城西三十四都爲浙閩通衢縣令史孟和有序

西堡同善橋鄉飲徐嘉樹建

同心橋在城西二十二都甯才華重建

玉波義橋在古溪上游

善安橋在古溪之曲

汾水高源橋在邑南六十都趙發祥建

赤石橋在三十五都黃元慶倡建徐兆吉捐田十餘畝善後

北鄉雙溪橋在十三都鄭家坊村口道光年間員外郎徐椿

齡重葺嗣命服姪郡廩生有志捐貲善後歷年踵修

上饒縣志

橋渡卷五

夫

義善橋在城北八都鄉飲蔣俊耀建

巖坵青石

楊婆橋蔡家貴建

石廡

北岸青石橋四十六都儒士蕭茂堅建

載福橋在城北十六都高山地方職員程廷錫於道光二十

九年建

雙濟橋在縣北十四都汪嶺背國學潘廷鎮建

觀音石橋在城東七十都民人陳興仁建

巖底橋在城東七十都民人劉漢燕建

大陂橋在城東六十八都附貢李孔堡等建

東橋在城東六十五都地當廣豐之孔道

葛藤橋在城南五十四都例貢吳伯呈於咸豐間助田租善

後田坐廣豐二十四都五堡土名江家山

永清橋在縣東四十里砍石鋪上首前有小捲橋一座舊志

載渡坎橋咸豐年間為水所圯澗口益寬今就狹小處捐

貲移建改名永清橋置田租善後

靈溪坂石橋咸豐戊午年監生李廷燮建

瀚溪橋在三十七都界同治元年建知府鍾世楨有記

上饒縣志

橋渡 卷五

堯

普安義橋在城北裏十都靈江湖界連玉西兩地合造同治
年間橋朽且傾出貲改建

廣濟橋在邑南五十八都大橫嶺直抵禁山衡通閩浙同治

六年重建

以上
新增

城南渡即平政橋邊水或暴漲橋輒解舊用小舟以渡甚危

成化五年知府王翰置大舟二隻渡夫四人專守以渡人

便之

白鶴渡在縣西二里大河內路達鉛山

灘頭渡在縣南二里永豐溪內路達鉛山

龍潭渡在縣西十里西渡諸溪跨靈山水

後洋渡在縣南十里

硤源渡在縣東七十里大河內路達廣豐

焦石渡在縣西三十里大河內原設有渡嗣經詹錫亮捐已

田十五畝又募捐十畝贍雇修船永為義渡路通石溪邑

歲貢丁復為記

峙港渡在縣南二十五里

香林渡在縣北二十里跨靈山小溪路達沙溪

黃石渡在縣東六十八都鄉賢里舊有銘云龍門之下五里

上饒縣志

橋渡 卷五

全

之淤溶溶河水利擅佃漁潭樹陰翳黃石成渠相形覆濟

永承權輿

章義渡在縣北三十三里河東岸頭依古圳出水下溪勘二

十餘丈係渡岸河西岸頭小溪出港上溪灘五十餘丈係

渡岸

龍潭義渡在縣西十里乾隆間監生楊朝選等倡建設義田

若干畝

港口渡在縣南六十都舊設有渡道光元年貢生潘世份職

員李廷用庠生潘鴻鎮民人陳顯明陳奇興翁志榮等共

捐已田十畝零外募捐資金共買田九畝七分零以贍修
船雇工飲賓李國榮捐建渡岸涼亭一座撐渡住屋兩間
民人呂文成捐亭基並撐渡住屋基永爲義渡土民潘北
元李達材陳懷鰲周廷瑞潘宗濂李克渠倡首

盤石渡在縣南十五里道光二年首士高爲鈺周廷瑞陳懷
鰲劉世芬李天貴洪維嵩高爲鏞宋繩祖龔日旺黃廷佐
劉文輝等倡勸捐由租共七十四石捐緣資金買田租三
十石以贍修船渡夫永爲義渡

沙溪義渡在縣東五十里沙溪下街接濟橋東嘉慶二年立

上饒縣志

橋渡
卷五

全

置有田租四十餘石糧坐六十八都四畝十一甲沙溪義

渡戶永贍渡費

以上
前志

玉波義渡在古溪上游

四村義渡在六十四都湖潭頭

高沙義渡在城南六十都

西山渡在城南六十都道光十七年國學周佩福民人周尙
學倡建置田租善後

長生渡在邑南九十里樟潭向有石橋爲洪水所圯民人吳
智銘捐貲造渡名曰長生置基地一片構數椽以宿渡夫

又置田數畝爲修葺費

金雞渡在城南五十四都職員吳伯英於道光年間助田租十五石民人吳雙慶於同治年間助田租壹拾石以垂永遠

砍石義渡在城東六十九都附貢生王學熙等同倡建助田十餘畝善後

東五密義渡在城東一都

靈溪橋義渡在城東二都

西山義渡在城東二都

二饒縣志 橋渡 卷五

全

楊村義渡在城東六十九都

周家鋪義渡在城東二都

李家石灘義渡在城東六十八都曲水村

龍門額義渡在城東六十八都沙溪上首

泉洋上首義渡在城南四十六都國學余兆元置

濟善渡在城南五十里徐圳從九林德裕倡置助田租五石爲修葺費基地一片架屋以住渡夫

高書義渡國學鄭臨波助田租善後

花紅巷義渡在城西半里許計船三艘其一爲旌德商幫等

捐造餘由官設道光三十年郡伯史士良移南門外浮橋
在花紅巷口因備渡船南門外利濟往來咸豐五年縣令
蔡香谷慮髮逆圍城將浮橋撤回故處通廣豐縣餽道該
渡遂移於花紅巷口之河津縣令楊鳳山撥浮橋舊租穀
石作修費以垂久遠以上
新增

二饒縣志
卷五

橋渡

全

